



✓
arte. Nr. 309.

Flacius Hely. M.

in M weitere Schriften.

darunter besonders

12
165

5] Heshiusius

K. IV. 33.

70

Gegenwarnung
ahn
Dottor Lucas Osi-
ander /

Dasz er sich eines newen Antichri-
stischen gewalts in der Kirchen nicht anmassen/
vnd frömbde Diener vnd Vnderthanen wider ihre Christli-
che Obrigkeit / vnd dero Gottselige / friedfertige Man-
data nicht verhezen wolle.

Gestellt
Durch etliche reine Prediger des Göttlichen
worts zu Heidelberg.



Tit. 3.

Erinnere sie / daß sie den Fürsten vnd der Oberkeit vn-
derthan vnd gehorsam seyen / zu allen guten wercken
bereit seyen: Niemand lestern / nicht hadern / gelinde
seyen / alle sanfftmutigkeit beweisen gegen allen
menschen.

(Niederrad a. d. H.)
Gedruckt durch Mattheum Harnisch.

1 5 8 4.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.



Handwritten text, likely bleed-through from the reverse side of the page.

Handwritten text, likely bleed-through from the reverse side of the page.



Gegenwarnung an Lucas Osiander D. etc.



An hat viel vnd offft gesage / es haben vns auch die alten gewarnet / da es gegen dem Jahr 1584 / sonderlich aber 1588 sein werde : sol dieselbige zeit (dieweil damals etwas wunderbares zugewarten) fleißig in acht genommen vnd betrachtet werden. Vnnd zwar es wissen fast alle verstendige vnd friedfertige Leut in Teutschland / vnnd sehen es mit schmerzen / daß / ob gleich nach absterben der vornemmen Helden / so die Augspurgische Confession gestellet / vnd auff allen Reichsträgen verthediget haben den Ubiquitisten vñ Flaccianern der mit sehr gewachsen : jedoch sonderlich vom Jar 1580 ihre frechheit vberhand genommen / beschwerliche trennungen eingefüret worden / vnnd sich (wie zubesorgen) allgemechlich die bosheit des newen Antichristenthumbs angefangen hat zu regen / daß / wo es der liebe Gott nit verhütet sehr zu fürchten / ehe wir das 88 Jar erreichen / werden wir durch solcher leuth anstiftung in ein wunderbare zerrüttung / vnnd in ein solches joch gerahen / welches vns nicht weniger als des Römischen Antichrists joch schwerlich drücken

Der anfang des newen Antichristenthumbs.

Osiandri
vermessen
heit.

3 Epist.
Johan.

wirt. Vnd daß ihm also sey/beweisen vnder andern
Luca Osiandri Doctoris vbiunitatis / vnd Hoffpredi-
gers handlungen vnd schriften / daß ja keiner von
den vornemmen Vbiuniters Lehrern ist / der nit mit
einem neuen primat schwanger gehe / vñ nach dem
Antichristischen vnsaubern Geist stincke. Welchs
wir/ob Gott wil/hell vñd klar/das ein jeder / der
den schnuppen nicht hat / es riechen wirt / beweisen
vnd dartzun wollen : hetten gleichwol viel lieber
dero leuchschand vnd vnarth zugedeckt. Dieweil
aber er D. Osiander mit solchem grim vnd hoch-
mut offentlich heraus fehr / daß er auch in die
Churfürstliche Pfaltz fallen/dieselbe stürmen/vnd
seine Hund/wie er sie im titel nennet/wider ihre D-
berkeit/vnd dero Christliche Mandata zu herzen sich
vnderstehet/müssen wir dem Exempel des H. Apo-
stels folgen/der von einem Diotrephe, dessen Nach-
folger Osiander ist/also schreibet: Diotrephe der
hoch gehalten sein wil/nimpt vns nicht ahn: Da-
rumb wenn ich komme / wil ich ihn erinnern sei-
ner werck die er thut / vnd plaudert mit bösen wor-
ten wider vns: Läßt ihm an dem nicht genügen:
Er nimpt nicht die Brüder an/vnd wehret denen
die es thun wollen.

Damit nun er Osiander als in einem Spiegel
sehen möge / wie sein Geist dem Geist des Anti-
christis sehr ehnlich werden wil / wo er nicht zeitlich
in sich selbst geht/vnd für des leidigen Sathans list
vnd verführung sich hütet / wollen wir etliche Kenn-
zeichen/

zeichen vñnd indicia desselbigen Geists/ die man an ihm spüret / guter meinung ihm vorhalten.

Erstlich weiß er / wie der Antichrist/ (spricht Daniel im 7 cap.) alle land werde fressen vñnd zu treten wollen/ vñnd vom Gregorio Magno selbs also für gemalet vñnd beschrieben worden / das er durch vermessenheit/ für ein General vñnd allgemeine Bischoff werde wollen angesehen sein/ wie dan Osiander sich vberreden leßt / er sey auff die Zinnen des Tempels gestellt/ vñnd hab macht vber alle Kirchen in Franckreich/ Niderland/ in der Churfürstlichen Pfalz/ was er seze/ warne/richte/ sol allein gelten: Gedencket nit wie er vor wenig jarn / von dē Niderlendischen vñnd Französischen Kirchen / mit seiner außgangnen warnung an dieselbige/ abgefertiget sey worden: Mercket nicht / daß der Osiandrische name in Teutschland noch nit so werdt vñnd holdselig sey/ daß jeder menniglich vor solchem namen sich biegen/ vñnd dardurch dem Herrn Doctori als bald zu gehorsamen bewegē werde lassen. Erinnerung sich nit/ wieder hochmut / fürwitz/ vñnd die leidige Polypragmosyne seinen Vatter in schreckliche irrthumb/ vñnd seinen schwager Funccium, der in Preussen das FACTOTVM in geistlichen vñnd weltlichen sachen sein wolt/ in jamer vñnd not gestürzt hat/ dz wir geschweigen / was für einē elenden außgang sein Consort vñnd mit Hoffprediger zu Stutgardt gewonnen / nach dem er Anno 76 vñnd 77 auß seinem beruff geschritten/ vñnd sich die vnschuldige fromme Kirchen vñnd Schuldner in der Churfürstlichen Pfalz vñnd erhört zu verdämen/ vñnd wegen deß zugemeßnen Calvinismi zu erbannē vñnd erwundē hat. In summa wie

Das erste
kennzei-
chen des
geists des
Antis-
christis in
Osiandro

Balth. Bi-
denb.

S. Paulus Gal. 6 erinnert: So sich jemand's leßt düncken er sey etwas / so er doch nichts ist / der be- treugt sich selbs. Ein jeglicher aber prüffe sein selbs werck. Denn vermessenheit vnd hochmuth tut nimmer gut / vnd wie S. Peter 1 Epist 4. vermanet: Niemand vnder euch leide als ein Ubeltheter / oder der in ein frembd ampt greiffet / etc. Dieses laster (spricht Lutherus vber denselbigen text) treibt der Teuffel allermeist in den falschen Chris- ten. Die wollen immer viel zuschaffen haben / vnd regieren da ihnen nichts befohlen ist / wie die Bischoffe vnd Geistliche thun / regieren die Welt. Item / die auffrührische vnd fürwitzige Prediger schädliche vnd gefährliche leut / etc. Vnd eben diese erinnerung haben die Theologen in der Newbur- gischen obern Pfalz Anno 76 dem Probst zu Tü- bingen / da er die Ubiquitistische Concordi formul herumb getragen / gethan / daß er nemlich wider seinen beruff handlete / vnd seines Ampts daheim außwarten solt / dann er Keinen Apostolischen be- ruff / (welcher mit den Aposteln auffgehört hett) weder mit schriften noch wunderwercken könte be- weisen. Da aber D. Osiander seine warnungen also deuten wolte / daß er nicht auß vermessenheit / freuel oder vorwitz / sonder auß Christlicher lieb / welche sich an alle gliedmassen der Christlichen ge- mein streckt / dieselbige gethan vnd geschrieben hett / sol er wissen / daß er kein verstendigen dessen bald vberredē werde: Den erstlich merckt mā an im / gleich im titel seines Buchs ein grewliche sucht / schwer- mut / vnd fast die krankheit / so die ärzte Lycanthro- pian

Ein Lu-
therische
warnung
an Osiander.

Ob Osiander
seine
warnung
aus Christ-
licher lieb
gethan.

pian nennen: dann er im lautter Wölffin der Chur-
 fürstlichen Pfaltz ein bildet / vnd seine hund wider
 dieselbige herzet / da viel mehr die Christliche lieb an
 ihm billich solte vermögen / dz er nit auß argwohn /
 oder auß einer parthey vnd giffziger leut Relation
 ein solches Vrtheil fellen / sonder gründlich zu or-
 erkündigen / vnd des angeklagten theils (fürnemb-
 lichen weil sein anklag die löblichste vnd höchste O-
 berkeit der Churfürstlichen Pfaltz antrifft) bes-
 richt einnehmen / vnd derselben ein ohr gönner
 solte. Zu dem / wo ein fündlein Christlicher lieb
 vnd rechten verstands bey dem Mann wer / solte er
 bey ihm selbs ermessen / das es nicht gut thun werd /
 wann viel hund in der Pfaltz bellen / vnd der Ober-
 keit Mandata anheulen vnd verlestern / welches nur
 viel zu viel leider von vielen vngestümmen vnd
 vnbescheidenen Predigern geschiehet / also das alle
 tag fast auß allen ämptern von den armen vnder-
 thanen / vnd zum theil von den Amptleuten k. as
 gen kommen / vber solches vnbesüßigt / außführisch
 vndergerlich schreien vnd lestern vieler Prediger /
 die etwan von ihrem Patriarchen Osandro ver-
 tröstet sind / wann sie nur dapffer lestern / werder
 sie entweder zu reichen Apteien vnd pfründen pro-
 mouiren / oder widerumb in ihre Pfahren mit ge-
 waffneter hand einsetzen. Es tröstet sich aber vn-
 sere Christliche Oberkeit des spruchs der im 22
 Psalm stehet: Hunde haben mich vmbgeben / vnd
 die böse rotte hat sich vmb mich gemacht: Aber
 du HErr sey nicht ferne / meine stercke eile mir zu
 helffen / errette mein leben von den Hunden. Wie
 hören

Trost wi-
 der die
 hunde Os-
 sandri.

3

hören aber wol / was diese leut vorwenden / vnd wie sie ihr warnen / bellen vñ schreien vermänteln wöllen: Nemlich / dieweil es zuthun sey vmb solch Mandat vnd Edict, wie Keyser Carl anno 31, oder zur zeit des INTERIMS anno 39 Mandat gemacht hat / wider welche D. Luther / vñnd andere Euangelische Lehrer geschrieben / oder wie es Osiander gar würig im eingang seiner warnung vorgibt / es sey vmb ein solchs Mandat zuthun / wider Gottlos Haman von König Ahasuero eins heraus gebracht hat / daß man alle Jüden tilgen vñnd außreuten solle. Daß sind fürwar starcke vrsachen / die ein ganz Land auffrührisch machen möchten / wann die sachen also beschaffen weren. Wer aber die augē ein wenig auffthut / vnd das mandatum recht lisset / oder die handlungen / so in der Churfürstlichen Pfalz vorgehn / anschawet / vñnd Osiandri vñnd seiner Consorten lehren / thun / fürnehmen vnd Process wider die vnsern dargegen helt / der wirdt bald finden / wer für die abgötter streitte / wer der abgötterey / so der Pabst mit den runden hostien treibt / die thür auffthue / wer der Haman sey / der hohe Potentaten wider vnschuldige leut verhetzet / vnd zur verdammung vnd vereilung derselbigen reizet. Dann das wir den Haman finden / müssen wir in die Histori Esther gehen / vnd dieselb erwegen / sonderlich was im dritten capitel vom Haman gemeldet wirdt: Wienemlich der König Ahasuerus den Haman groß gemacht / in erhöcht / vnd seinen stul vber alle Fürsten die bey ihm waren / gesetzt hab / also daß alle knecht des Königs beugeten die knie / vñnd bettetten Haman an: Allein der from Jud Mardocheus wolt es nit

Die rechte Histori Haman: vnd wer Haman sey.

„
„
„

es nicht thun: Darumb Haman voll grims ward/
 vnd trachtet das ganz Jüdisch volck zuuertilgen/
 beredet den König/es were ein Volck zustrewet im
 Land/ vnnnd hett andere gesatz dann andere Völ-
 cker: bracht also ein gebott herauß zuuertilgen/ zu-
 erwürgen vnnnd vmbzubringen alle Jüden beyde
 jung vnd alt/ Kinder vnd weiber auff einen tag/ etc.

Da laßt vns den heutigen Haman entde-
 cken/vñ sehen/wer jetz demselbigen ehnlich sey. Was
 ist/ vmb Gottes willen/heutiges tags die vrsach/
 warumb wir verlestert/verkerzert/verdampft vnnnd
 verworffen / ja als Wölff / die man tödten vnnnd
 würgen soll / angeschrien werden: denn das wir
 Ssandri vnnnd der sechs Bergischen Patriarchen
 schriften nicht anbetten können? Wolten wir
 aber den Vbiquitisten vnnnd Flaccianern ein fußfall
 thun/vnnnd die Vbiquitet anbeten/weren wir die bes-
 sten leut auff Erden. Da wir es nicht thun wollen/
 müssen wir dem Ssandro herhalten / vnd von ihm
 auff's aller greulichst angezogen werden/ da hilfft
 vns nichts / daß wir mit S. Paulo 1 Cor. 3 glau-
 ben/ daß keiner kein rechten grund legen kan/ausser
 dem der gelegt ist / welcher ist Jesus Christus: So
 man mit Ssandro nicht glaubt die vier widerwers-
 tige fundamenta Lutheri im handel des H. Abend-
 mals. Es hilfft vns nichts/ daß wir die bekantnuß
 des Glaubens des alten frommen Lehrers Atha-
 nasilij, wie auch andere bewerte vralte Symbola an-
 nehmen/wo wir nicht Ssandrum / seine rottgesel-
 len vnd ihre schriften anbetten: In summa / es gilt
 die Concordi der trefflichen menner/Lutheri, Me-
 lanchthonis, Buceri, Capitonis, vnerwogen wie hoch

vnnnd hart dieselbige Concordia betenrt worden ist/
 nichts mehr / wo man sich nicht zu der Vbiquitisten
 vnd Flaccianern Concordi bekennet / die da öffentlich
 Melanchthonem, Bucerum, vnd vast alle vornembste
 Euangelische Lehrer in verdacht grosser irr-
 thumben ziehen / vnnnd welches zuerbarmen ist / ha-
 ben diesel Hamans brüder viel ansehliche Herren vñ
 Regenten dermassen eingenommen / daß alle die /
 so ihre Knie für dem Bergischen Abgott nicht bie-
 gen wöllen / so verhaßt vnd vnwerdt sind / daß man
 sie weder sehen noch hören oder dulden wil / sonder
 ist Dsiander der meinung / daß sie nicht weniger als
 Wölff angefeindet / getödtet / von hunden gejage
 vnnnd zerrissen werden sollen. Darumb er auch mit
 seinen Consorten im Strift Cöln die blutdurstige
 Spanier viel lieber sihet toben / dann daß den ar-
 men Christen / die des Calvinismi, wie er es nennet /
 das ist / der reinen lehr von den Sacramenten
 halben verdächtig sindt / geholffen vnnnd zuges-
 prungen werden solt. Da ist billich zufragen / wo
 D. Dsiander sein gewissen hingesteckt hab / als er
 im eingang seiner giftigen warnung / das Christ-
 lich friedfertig Mandat / des Durchleuchtigsten
 Hochgebornen Fürsten vnnnd Herrn / Herrn Jos-
 hann Casimirs Pfalzgraffen bey Rhein / Vor-
 munds / vnnnd der Churfürstlichen Pfalz Admini-
 strators, Herzogen in Beyern / etc. Unsers Gne-
 digsten Herrn / dem Gottlosen mörderischen Edict
 vnd außschreiben / welches Haman vom König A-
 hasuero wider die Jüden heraus bracht / hat dörfen
 vergleichen / da jedermeniglich / so gedacht vnser
 rer Gnedigsten Herrschafft Mandat liest / als bald
 merck.

merck / vundes Slander nicht leugnen kan / das
 der inhalt sey / das das reine wort Gottes sein stra-
 cken lauff hab / die recht verdante irrthumben / vnd
 auch alle vngegründte lesterungē abgeschafft wer-
 den: In denen puncten aber / so zwischen den Euang-
 gelischen noch nicht aller dings erörtert sind / bey-
 derseits gedult getragen / vnd fried gehalten wer-
 de / bis Gott der H & X & X gnad giebt / das in einem
 ordenlichen freyen Concilio , oder sonst in einer
 rechtmessigen versammlung der Euangelischen Kir-
 chen / diese ding zu besser richtigkeit gebracht wer-
 den. Was ist vmb Gottes willen in solchem Man-
 dat / das dem gewulichen Mandat Hamans oder
 Ahasueri gleich sey: Hama wolte angebeten sein:
 das Fürstlich Mandat wil / das Gott allein vnd
 nicht die menschen oder Pralaten / sie haben ein na-
 men wie sie wollen / angebeten werden. Das Man-
 dat Ahasueri ist wider den vnschuldigen Mardo-
 cheum gerichtet / das Fürstlich Mandat befihlt /
 das vnschuldige Kirchen vnd Kirchenlehrer nicht
 verlestert werden: Dann es ist nicht genug / wann
 Slander sagt: Die Calvinische haben ein frembde
 lehr. Dann der Gottlos Hama vberredt auch
 den König Ahasuerum also / das Jüdisch Volck
 hett einander gesetz als die andere Völcker / vnd
 het nicht nach des Königs gesetzen / wie man heut
 von vns sagen wil / in dem wir den Vbiquitisten vnd
 Flaccianern nicht beyfal thun / das wir ein sonder-
 bare verworffene Religion haben. Das Mandat
 Hamans vnd Ahasueri befalh / das man die Jü-
 den tilgen vnd würgen solt / wie Slander mit sei-
 nem schreien vnd lestern (da er vns jetzt den Wölff-

fen/ jetzt den Türcken vergleicht) anlaß vnd ursach
 giebt / daß viel armer Christen auch im H. Reich
 verlassen / ihre sachen / frömbde sachen geachtet /
 vnd also den wütenden Tyrannen zuwürgen vber/
 geben werden. Hergegen das Fürstlich Christlich
 Mandat vermanet zum Frieden vnd zur einigkeit/
 vnd leßt daneben die gewissen frey. Darumb bil/
 lich D. Oslander besser auff seine reden / vnd ver/
 gleichungen acht haben / vñ sich des spruchs Esa. 5
 erinnern soll / der also lautet: Behedenen die böß
 ses gut / vnd gutes böß heissen / die aus finster/
 nus liecht / vnd auß liecht finsternus machen/
 die auß sawer süß / vnd auß süß sawr machen :
 Behedenen die bey sich selbst weise sind / vnd hal/
 ten sich selbst für klug. Item S. Paulus Rom. 14.
 Wer bistu / daß du einen frömbden knecht richtest?

Das an
 der kenn
 zeichē des
 Antichri
 stischen
 Geists.

Wir wollen aber schreiten zu einem andern
 Kennzeichen des Antichristischen Geistes / der sich in
 dem Osandro sehen leßt / dieweil er nemlich gleicher
 gestalt / wie die Pāpst zu jeder zeit gethon / von der
 Christlichen Oberkeit / die es mit ihm nicht helt /
 schimpflich zu reden / vnd hohe Potentaten wider
 einander auffzubringen sich vnderstehet / vnd
 macht es so grob / daß auch ein jeder gering versten/
 diger sehen vnd greiffen muß / wie er eben der rechte
 Mann ist / der seine fromme Herrschafft wider vns
 seregnedigste Oberkeit hezet / vnd gleich wie der
 Papst Clemens vor etlich Jaren in Italia, also wolt
 er in der Churfürstlichen Pfalz gern ein lermen /
 zwittracht / vnd auffruhr stifften vnd anstellen.
 Dann

Dann das gibt ihm Keinen behelff noch außflucht/
 daß er viel protestiret / er wolle in seinem schreiben ^{Nichtige}
 mit vnserm gnedigsten Herrn / Herzog Johan ^{Protesta-}
 Casimiro etc. nichts handeln / sonder allein deren ^{tion Dsi-}
 verschlagene Süchlist anzeigen / die das Mandat ^{andri.}
 erdacht / gerahen / concipirt / vnd vnder ihres Her-
 ren namen vnd Secret außgesprerget: Dann
 dalauß die protestation wider die that / Vnd die
 that wider die protestation / vnd ist fast ein solche
 protestation als des Pilati / welcher seine händ
 wusch / wie er den vnschuldigen Christum zum todt
 verurtheilet. Dann heist das (vmb Gottes willen)
 mit Herzog Johan Casimir Pfaltzgraffen etc.
 nichts handeln / wann man die Vnderthanen ver-
 manet / daß sie seiner S. G. Mandatis nicht gehorsa-
 men / sondern dieselbige als des Ahasueri oder Na-
 mans Mandat achten sollen: Heist das mit Her-
 zog Johan Casimir Pfaltzgraffen etc. nichts wol-
 len handeln / wann man so einen vortrefflichen
 Fürsten des Reichs / wie seine S. G. sind / der seines
 hohen verstands vnd erfahrung / wie auch seines
 Christlichen eyffers halben / in allen vornembsten
 Prouincien Europæ bekant vnd berhümbt ist / für
 ein solchen alberen Fürsten außgibt / der nicht wisse
 vnd verstehe / was er vnder seiner Fürstl. G. hand-
 schrift vnd Secret mandire / vnd außgehen lasse:
 Heist das mit Herzog Johan Casimiren etc.
 nichts handeln wollen / da Dsiander seiner S. G.
 die würde / zu welcher dieselbige von Gott dem All-
 mechtigen nach dem wolherbrachten recht der Gul-
 den Bull / Pfälzischen vralten Satzungen / vnd
 mit allgemeinem Consens der ganzen Landschaft

pag. 24.

beruffen / abspricht / auff Keyserliche Maiestet
 vnd andere Stände dreyet / vnd nichts liebers sehe
 (damit er nur sein mütlein an denen / so in vnd sein
 vbiq̄itet nicht anbetten wollen / k̄ülen möcht) dan
 daß die Pfaltz / sein Landsfürst / vnnnd andere Für-
 sten einander ins haar fielen? Dann auß seiner
 giftigen warnung merck̄t man wol / woher die ver-
 bitterung etlicher Ständ wider die Pfaltz vr-
 sprünglich herfließe / vnd das es solche gelegenheit
 hab (auff daß wir eingleichnuß brauchen / welches
 dem Osandro bekant sey) wie ein fürnemmer Bi-
 schoff ein maal sagt vom Concilio zu Trient / daß
 nemlich das Concilium beschaffen were wie ein gros-
 se Orgel / vnd des Papsts Gesandten wie die Spiel-
 leut / die Blasbälck aber weren der Papst vnd sei-
 ne Cardinal zu Rom. Ein solcher Blasbalck ist
 der Teutsche Papst Osander / sampt seinen mit-
 Cardinālen / vnd fragt nichts darnach / wie es dem
 Vaterland gehe / noch was für zerrüttung darauß
 erfolgen mög / wann er nur seinen primat erhalten
 kan. Solcher Papst aber ist S. Peter nicht gewe-
 sen / der im 5 cap. seiner I Epistel vn̄ sonst / die Predi-
 ger / daß sie vber das Volck Gottes nicht herrschen /
 sonder einander vnderthon / vnd an der demut vest-
 halten sollen / ernstlich vermanet: welcher Aposto-
 lischen warnung alle fromme vnnnd Gottselige Bi-
 schoffe gefolget / vnnnd nicht auff Keyser oder Für-
 sten getruzt / auch keine andere waaffen / dann pre-
 ces & lacrymas (wie Ambrosius redet) gehabt / vnnnd
 wie Bernhardus spricht / non ferro sed verbo sich ver-
 thediget haben. Nach dem aber die Römische Pāpste
 ihre Tyranny vnnnd Herrschafft wollen bekräfti-
 gen /

Gleich-
 auß von
 einer Dr-
 gel.

Die rech-
 te waaffen
 der Prie-
 ster.

gen / haben sie diesen rancē gebraucht / daß sie Für-
 sten vnd Potentaten an einander gehetzt / vnnnd mit
 ander leuch schaden vnd vnderdruckung sich groß
 gemacht. Es sehe aber Oslander / daß ihm nicht
 also gehe / wie dem Doegdem Edomiter / daruon er
 lesen mag den 52 Psalm. Vnd darff zwar wider die
 Concipisten des Christlichen vnnnd friedfertigen
 Mandats nicht zörnen / es sey denn daß er wider vn-
 sere gnedigste Herrschafft / vnnnd dero hohe vnnnd
 trefliche Rāht zörnen / vnnnd dieselbige rechtfertis-
 gen wolle. Wil er aber sunst zörnē / so sol er wider die
 Concipisten der Vorred des Bergischen Concordi-
 dibuchs zörnen / da jedermenniglich wol siehet / daß
 diese seltsame in Cangeleien vngewönliche wort /
 substantialiter, formaliter, habitualiter, subiectiuē,
 nicht von Fürsten oder Cangeley verwandtē / sonder
 von den dichtern des Concordibuchs herkommen.
 Oder wil er zörnen / so thue er es wider die Concipi-
 sten / deren decreten in der Churfürstlichen Pfaltz /
 die den frommen Churfürsten Ludwigen / löblicher
 gedechtnuß / sollicitirt vnnnd gleich genötiget haben /
 daß er dem Concordibuch vndergeschrieben / vñ aller-
 ley diener / wegen vnser reiner lehr von den H. Sas-
 cramenten beurlaubt vnd abgeschafft / wie er auch
 vor sieben jaren in schriftten vnserm Gnedigsten
 Herrn Brüderlich vnnnd mit beschwerden geklagt /
 daß etliche seine Exceptiones vnnnd bedencken formu-
 lam concordiaē belangend / sonderlich de Synodo nit
 in acht genommen weren worden / vnnnd weiß vnser
 Gnedigster Herr auß den Actis, so ihre Fürstliche
 Gnaden bey handen haben / sehr wol / welche die jeni-
 ge seine sanfftmutige Theologen sind / die durch ein
 vnablesz

vnablesiges anhalten ihrer S. G. Herren Brudern wider die genante Caluinischen / das ist wider die / so dem Papst Nicolao vnd Martino nicht glauben / also verbittert / vnd zu endlicher abschaffung derselben gerahen haben.

Das dritt
kennzeichē
des Anti-
christische
Geists.

Das dritt Kennzeichen des Antichristischen geists in Ssiandro ist der Geist der lügen / calumnien vnd lesterung / mit welchen jederzeit der Antichrist vmbgangen / vnd seine sach hat wöllen erhalten / wie noch erst newlichen die Königin auß Engelland von den Pöpstlern beschuldiget / vnnnd angeklagt ist worden / als wann ihre Königliche würde viel leut wegen der Pöpstliche Religion verfolget het / da doch in die 26 Jar / die sie regiert hat / nicht einer wegen der Religion / wie die Acta publica außweisen / sonder allein auffruhrs vnnnd schändlicher verrähterey wegen gerichtet worden / also gibet Ssiander mit vngrund für / daß es vnserer Christlichen Oberkeit nicht ernst sey / daß sie keinen wegen der lehr / sonder allein vmb der vnbescheidenheit willen außjagen wölle / dieweil (wie er sprichet) schon vor dem Mandat etliche reine vnsträffliche Lehrer bevlaubt worden. In welchen worten Ssiandri erscheint zum theil ein grosse vermessenheit / in dem er ein hertzkindiger seyn will / vnnnd wissen was andere leuth im Herzen haben / vnnnd zum theil daß er denen gleich sey / dauon Esaias 28 cap. schreibt: welche die lügen ihr zuflucht vnnnd heucheley ihren schirm machen. Dann alle handlungen geben das widerspiel / vnnnd wissen die Käht / Amptleute vnnnd Vnderthanen in der Churfürstlichen Pfaltz / daß man keine Prediger bevlaubt hat / außers
halb

halb zweien abtrünnigen / die es weder mit ihnen /
 noch mit vns gehalten haben / vnd dann die entwe-
 der kein gewissen beständigen beruff gehabt / vnd
 vberflüssig gewesen / oder aber gleich im anfang sich
 als öffentliche feind vnsrer Gnedigsten Oberkeit
 erzeigt / deroselben das gemein vnd Christlich Ges-
 bett nicht gegünnet / sie dem Ieroboam, Achab, vnd
 andern Gottlosen Königen verglichen / auch etli-
 che sich öffentlich vernemmen lassen / daß sie ihre
 Fürstliche Gnaden bey dem H. Tauff zum Gevatz-
 tern stehen zulassen bedenkens hetten / vnd der-
 gleichen vnzalbare lesterungen mehr / die man mit
 grosser gedult zum offtermal hat müssen hören /
 vnd sind dannoch solche lesterer nicht als bald be-
 vrlaubt / sonder nach notturfft verhört / vberwie-
 sen / vnd demnach sie halßstarrig blieben / vnd von
 ihren auffrührischen / vngegründten reden nicht
 haben wollen abstehen (dieweil sie and erstwo ande-
 rer dienstern gewiß gewesen / vnd nicht hoch nach ih-
 ren Pfarkindern gefragt) als dann erst abge-
 schafft worden. Da im gegenspiel die vnsere vor
 sieben Jaren durch trieb der Ubiquiterischen vnd
 Flaccianischen Prediger sind vertrieben worden /
 ehe ihnen einig gesprech / einige ordenliche verhör /
 (vngeachtet sie vielfeltig drum angehalten) viel
 weniger ein freye öffentliche Disputation / wie jetzt
 geschiehet / vergünnet worden: Ja mancher armer
 Pfarherr hat mitten in der Nacht ernstlichen be-
 felch empfangen / daß er den Pfarhoff als bald rau-
 men solt / vnd da etliche von den vnsern zu Heidel-
 berg mit den ersten Prälaten / die hieher geschicket
 waren / in abwesen des Churfürsten / sich zu einem

C

freundlichen gesprech erbotten / ist ihnen vom Gegentheil geantwortet worden / es stünd in ihrer Instruction nicht / daß sie mit den vnsern sich vnderreden solten: allermassen D. Osiander etlichen hohen vnd vornemmen personen / die ohn gefehr vor anderthalb Jaren von ihm in der Statt Cöln ein Predig zuhören begerten / auch ein solche antwort gab / daß er dessen in seiner Instruction keinen befelch het. Noch darff der vnruwige Mann wider vnser Christliche Oberkeit / wann dieselbige einen oder zwen / nicht zwar reine Prediger / sonder grobe halstarrige auffrührische Lestere abschafft / vnd wider vns / die keinen frieden / kein freundlich gesprech / keinen gruß beim gegentheil können erlangen / Wordio schreien / vnd sich beklagen / es werde den Obiquistischen vñ Glaccianischen Predigern das Maul gebunden / vnd ihnen alle ihre waaffen genömen / wann sie nicht mehr wider die genante Calvinisten wüten / vnd als rasende Hund bellen dörfen. Dann diese Prediger mehrertheils theren gar kurze predigten / wo die lesterungen vnd Calumnien wider die so man Zwinglische vnd Calvinische nennet / abgeschnitten werden solten / vnd gilt also bey ihnen diese regel vnd vermanung S. Pauli Phil. 4 gar nichts / da der Apostel spricht: Was warhafftig ist / was erbar / was gerecht / was keusch / was lieblich / was wol lautet / ist etwan ein tugend / ist etwan ein lob / dem dencket nach. Was thun aber diese leute: Ir größte kunst sol seyn daß sie treffentliche rüstzeug Gottes vnd wolverdiente männer verlestern / vnd dem

Teuffel

Die beste
waaffen der
Obiquiti-
sten.

Teuffel geben / wie dem Osiandro Oecolampadius,
 Caluinus, vnd dergleichen berühmte Lehrer / vnse-
 liger gedechtnuß männer heissen. Denckt nicht / daß
 er nicht bald einen Propheten recht verstünde / wo
 ihm die auslegungen solcher träßlichen Männer
 Oecolampadij vñ Caluini nicht weren zu hülf Kom-
 men / vnd ist ihm diß gemein mit dem Antichrist zu
 Rom / der Martyrem, Caluinum vnd Bezam für die
 größte Ketzer in der Welt helt vnd anfeindet / dies
 weil sie seiner Abgötterey ein grossen stoß gethan /
 vñ wie der Papst alle ergernuß vnd zerrüttung-
 gen / vnder andern den Bawrenkrieg anno 25 / vnd
 den Protestirenden Krieg anno 46 / dem Luther vñ
 seiner lehr zugeschrieben: also muß dem Osiandro
 die reine Lehr des Euangelij ein vrsach sein alles
 jamers im Niderland / Franckreich vñ anders-
 wo / da das Euangelium gepredigt wirdt. Dieses
 Argument oder diese schlusßred haben der Papst zu
 Stutgart / vnd der Papst zu Rom gelehrnet / von
 den vngleubigen Jüden / die Jerem. 44 cap. sagten:
 Sind der zeit wir haben abgelassen der Königin
 des Himmels zu reuchern / vnd tranckopffer zu opf-
 fern / haben wir alle mangel gelittē / vñ sind durch
 Schwert vnd hunger vmbkōmen /c. Was sonst
 Carlstat anlangen thut / wie offte haben alle vnser
 Kirchen vñ Kirchenlehrer bezeuget / daß sie mit sei-
 nen auslegungē vnd handlungē nichts zuthun hers-
 ten: wie offte ist auß den Tomis Lutheri erwiesen wor-
 den / daß es besser gewesen were / er D. Luther durch
 darreichung eines Goldgüldens / vnd seine prouo-
 cation het solchen lermen nit angezündet / oder zum



wenigsten nicht continuirt vnd grösser gemacht / wie auch er bewlicher wer gewesen / daß er viel mehr wider die irdische weisheit / dan wider die himlische Propheten geschrieben vnd gestritten het / dann die irdische weisheit ist Teuflich / spricht S. Jacob 3 cap. bringt neid / zant / vnordnung vnd eitel böse ding / die weisheit aber von oben her ist keusch / fridsam / gelind / vnparteyisch.

Die ver-
meinte
gründ D.
siantri wi-
der vn-
schuldige
Christen /
die er Cal-
uinisten
nennet.

Laßt vns aber hören / mit was schein vnd gründen D. Siander seine lesterungen / Anathemata vnd verdammungen dero / so er Calvinianer nent / wider das Christlich Mandat vnserer Gnedigsten Herrschafft zubeschönen / vnd zubehauptē sich vnderstehe. Sein erster grund ist dieser: Es seie ihm nicht also / daß Chur vnd Fürsten vnd andere Ständ sich vor dieser zeit verglichen haben solche condemnations einzustellen. Dieweil aber Siander wol weiß / daß alle Reichs abscheid / in welchen keiner verdammung der Zwinglischen vnd Calvinischen gedacht wirdt / vnd sonderlich der Naumburgisch Recels, vnd zuvor der Franckfordische abschied / da außdrücklich solche condemnations, ob sie wol von etlichen gesucht worden / außgelassen / eingestelt vñ abgeschlagen worden / mit außdrücklicher erklärang / daß man durch solche condemnations kein vrsach geben woll / jemandes von der gemeinschafft der Augspurgischen Confession vnd auß dem Religions frieden zuschliessen / wider ihn sind / sucht er einen andern beweiß / vnd wil also schliessen / die Chur and Fürsten haben ihren Theologen gestattet die Calvinische lehr in öffentlichen schriften zu widerlegen: Item / haben dem Concordibuch

Sibuch vnderscrieben: Item/Pfalzgraff Lud-
 wig Churfürst etc. hat mögen leiden/das die Zwings-
 lischen in dero Hoffcapell/inn seiner Ch. G. gegen-
 wart / hart sind gestrafft worden: Item / ihre
 Ch. G. haben etliche vorneme diener / vnnnd die
 Pfarherr / so in verwerffung des Calvinismi nit
 eingewilliget / ihrer diensten erlassen / auch sich das
 hin erklärt/sie weren den Calvinischen von hertzen
 feind/folget/spricht Siander/das Chur vnd Für-
 sten die condemnationes oder verdammungen der
 Calvinischen nie eingestelt haben. Hilff Gott wie
 ist das ein selzamer vngeschickter vnd vngegründ-
 ter beweis: das Christlich Mandat zeucht sich
 auff gemeine Reichs Recces, vnd öffentliche allge-
 meine handlungen vnd erklärungen der Churfür-
 sten vñ Ständ des Reichs / so führet vns Siander
 in ein Hoffcapell oder zwo / vnd das sollen gemeine
 abscheidt des Reichs sein / was heutigs tags etliche
 verleumbder darin predigē. Die Fragist von Chur
 vnd Fürsten / so weist vns Siander auff etliche
 Clamanten, die wider vns predigen. Zu dem / wer
 wirt ihm dieses passiren lassen / daß alles was in der
 Chur vnd Fürsten gegenwart / vnd in ihren Hoff-
 capellen gepredigt werd / den Fürsten als bald ge-
 falle vnd angeneh sey: Sintemal die Zuhörer die
 lehr prüfen / vnd was auß Menschlichen affecten vñ
 ohn grundt der schrift geredt wirt / in alle weg vñ
 vnterscheiden vnd mercken sollen. Es hat im D. Ia-
 cobus Andrea selbst nicht alles gefallen lassen / was
 er von den Heidelbergischen Hoffpredigern anno

NOTA

Churfürst damals gefolget/het er seine Hoffpredi-
ger nicht lang geduldet. Hat auch ohn zweiffel dem
frommen Churfürsten Ludwigen in seinem Her-
zen vbel gefallen / daß etliche vnuerschamte Pre-
diger seinen lieben Herrn Vater löblichster ge-
dechnus/vnd seine Christliche lehr dem Teuffel ge-
ben haben / wie alle tag zu Heidelberg vnd anderst
wo treffliche/vornehme Rät / die sonst Lutherisch
sind/vnd die Lutherischen Predigten hörē/bezeu-
gen / daß sie an solchen vnzeitigen vnd lesterhafften
verdammungen nie kein gefallen getragen. Da-
rumb auch Pfaltzgraff Ludwig Churfürst vor
etlich Jahren mit seinen vornemsten Räten dahin
entschlossen / vnd sich mit vnserm Gnedigsten
Herrn Herzog Johan Casimir. Christlich vnd
brüderlich verglichen / daß dergleichen condemna-
tiones eingestellt werden solten / ob er schon solches
von etlichen seinen halsstarrigen vnruwigen mit
dem Flaccianischen vñ Ubiquitistischen geist einge-
nommenen Predigern nicht hat können erlangen/
vngeachtet / dieselbe zu vnderchiedlichen maalen/
wie mit glaubwürdigen leuten zu beweisen / von sei-
ner Ch. G. darumb ernstlich gestrafft / vnd solcher
verdammungen vnd lesterungen sich zuenthal-
ten erinnert worden. So hat auch vnser gene-
digste Herrschafft die namen vnd handschriften
der jenigē vnruwigen practicanten / die irer Ch. G.
keine ruh gelassen / vnd dieselbe wider ihre angebor-
ne sanfftmütige art vnd natur / ja auch wider ihr
vorhaben zu solcher abschaffung der diener vnd
Prediger / vnd zur verbitterung wider die genan-
ten Calvinischen gleichsam gedrungen haben / wel-
chem

NOTA

chem rath doch ire Ch. G. niemals aller dings nach
 kommen sind / vnd weren ohne zweiffel ihre Ch. G.
 viel frischer vnd gesunder gewesen / wo solche gifti-
 ge schlangen / die dem frommen Herrn die ohren ohit
 vnderlaß mit verdammungen / verbannungen / vñ
 andern giftigen reden gefült habē / seine Ch. G. nit
 also gekrenckt / gemartert vnd geplagt hetten. Dañ
 sonst ist offenbar / vnd auß vielen handlungen vnd
 schriften augenscheinlich zu beweisen / das ihre Ch.
 G. vngern vñ mit gewissen conditionibus vñ bedin-
 gungen / wie auch ohn zweiffel andere Chur vñ Für-
 sten zu vnderzeichnung des Concordibuchs kom-
 men. Dañ auß der vorred desselbigen offenbar / das
 sich etliche Theologen zu dēselben werck eingedrū-
 gen / vnd die löbliche Fürsten vberredt haben / als ob
 die Vbiquitet gar nicht darinn versteckt / sonder wer-
 nur ein erklärung der Augspurgischen Confession,
 welche in rebus vnd phrasibus mit derselben vberlein-
 käme: Item / das keine verdammung vnserer Kirchē
 darin gemeint seie / welches aber nit ist / vnd gestehen
 solchs die vornembste Authores des Cōcordibuchs in
 irer Refutationschrift wider die Anhaltische Theo-
 logen / das ihre phrasen oder art zureden von der Vbi-
 quitet, weder im wort Gottes / noch Augspurgischer
 Confession vñ Apologi stehen. Vñ mercken schon all-
 bereit etliche vorneime Fürsten vñ Rāht / das sie mit
 demselben Buch iren scopum der gewünschten Con-
 cordi nicht erreicht haben / sonder in grossen vnko-
 sten vñnd weitere trennung geführet worden sind.
 Wie dann auch Heshusius selbst in Actis des Que-
 delburgischen Colloquij bekennet / das er vñnd die
 Widersächsischen Kirchen durch die im Concordis-
 buch

Der Ber-
 gische Pa-
 triarchen
 betrug.

buch verdeckte Ubiquitet betrogen / vnnnd daß mit
 ihnen von dem vornemsten Authore des Concordi-
 buchs nicht auffrecht gehandelt worden. Ist nun
 das nicht vmb Gottes willen ein schön Apophtheg-
 ma oder weiser spruch / welchen Siander vñ Pfaltz-
 grauen Ludwigen Churfürsten etc. erzelen / vnnnd
 mit grossen buchstaben verzeichnen darff / daß er
 nemlich sol gesagt haben: Er were den Caluini-
 sten von hertzen feind. Dann wann Siander ein
 tröpflein Theologischen bluts / oder rechten ver-
 stands hette / würd er daß nimmermehr erzelet / viel
 weniger so hoch angezogen vnnnd gerümbt haben:
 Dieweil ein Christ den irrthumben / nicht aber den
 Personen feind sein sol. Vnnnd solte je der Chur-
 fürst wie Siander für gibt / den Caluinisten also
 von hertzen feind gewesen sein / müßt er seinem lieben
 Herrn Vatter / desgleichen seinem geliebten Brus-
 der / vnserm Gnedigsten Herrn / wie auch vielen
 vornemmen Rhäten / die ihre Ch. G. alle tag an
 der Taffel gehabt / vnnnd für Caluinisch außgeschrien
 worden / von hertzen feind gewesen sein. Darumb
 nicht zuermuten / daß der from vnnnd verstendige
 Churfürst solchs der gestalt geredt / oder aber wirdt
 diß der verstand gewesen sein / wie es mit andern
 Fürsten vnnnd vielen guten leuten auch solche mei-
 nung hat: Daß sie dem Calvinismo so ferr feind
 sind / als ferr derselbig so ein vngehewrer irra-
 thumb sey / wie diese lesterer vorgeben / da nemlich
 Christo sein Testament cassirt / sein allmacht ge-
 leugnet / er von seinem Thron abgesetzt / ein Arrianis-
 mus eingefüret / nichts dann blosser zeichen auß den
 Sacra

Sacramenten gemacht. Wenn das der Calvinismus wäre: wer solt einem solchen Calvinismo von grund des hertzens nicht feind sein/wie wir rund vor Gott vnd der welt zeugen/das keine leuht auff erden solchen geweln/die von den Ubiquitisten vnnnd Glacianern auff vns erdacht sind/so feind vnd abhold sind/als wir selbst/wie es dann auch zu jederzeit die vornembste bescheidene Lehrer der Augspurgische Confesion wol gemerckt / vnd deswegen brüderliche freundschaft mit vnsern Kirchen gesucht haben: Vnd zwar/wer in der warheit vnd eigentlich wissen wil/was böse friedhässige leuht den CALVINISMUM nennen / vnd vnder diesem namen bey den einfeltigen so verhaßt machen/ist es nichts anderst als die lehr von den H. Sacramenten / welche die allgemeine Euangelische Christliche Kirch mehrertheils / sonderlich aber die Kirchen / so durch langwirig Creutz bewert sind/schöpffen vnd holen/nicht auß dem groben / vnnnd doch von etlichen so hoch gerhümbten widerruff Berengarij durch den Papst Nicolaum gemacht / oder auß dem Cardinale Cameracense, vnd den Streitschriften D. Lutheri/sonder auß den klaren / ganzen worten der einsetzung des H. Abendmals: Item/ auß der art zureden von den H. Sacramenten/die in der ganzen Heyl. Schrift breuchlich / vnd auß der eigentlichen verheissung des Euangelij / alles nach anweisung des H. Apostels S. Pauli / vnd auch der Apologi Augspurgischer Confesion / vnd zuvorderst den Articlen vnser Christlichen Glaubens von vnserm HERRN Jesu Christo / der da zwo vnderchiedliche Naturen hat / vnd deswegen / ob er schon in bei-

Was eigent-
lich
Calvini-
smus sey.

D

den Naturen vnser einiger / gantzer / vnzerrenter
 Heyland vnd Emanuel ist / wirt er doch nach art
 der Menschheit vñ seines Fleischs in gewissem ort /
 wo vnd wie er will vmbgeschrieben: Ist aber vñ reicht
 allenthalben / nach seiner vnendlichen ohn vmb-
 schriebenen natur / nemlich nach der Gottheit. Dis
 ist der recht Catholisch glaub (spricht Vigilus lib. 4
 contra Eutychen) vnd eben die bekantnuß / welche
 die Apostel vbergeben / die Martyrer bekräftigt /
 vnd die Gläubigen zu jeder zeit behalten haben.
 Solchen glauben aber nennen heut die Ubiquiti-
 sten einen Calvinischen glauben / da wir doch we-
 der in Schrifften / noch auff den Canglen zum Cal-
 uino, sonder allein zu der H. Schrifft alten vnd
 neuen Testaments / vnd zu den bewerten Symbolis
 Ecclesie vns beruffen. Was sonst die Person Iohans
 nis Caluini anlangt / ist er ein Mensch gewesen wie
 D. Luther / ein Prediger vnd lehrer des Euang-
 gelij wie D. Luther / allein daß er kein Mönch ge-
 wesen / wie Lutherus selbst deswegen desto mehr
 nach dencken vnd gedult mit seiner lehr zu haben /
 erinnert: dieweil er als ein Mönch im Papstumb
 sehr tieff gesteckt / hat auch Caluinus der massen das
 alt vnd neue Testament erkläret / daß ihu vor et-
 lich Jaren D. Iacobus Andrea sein Præceptorem ge-
 nennet hat. Ist auch seliglich vnd inn der anruf-
 fung Jesu Christi entschlaffen / nicht weniger als
 D. Luther Vnd weiß die ganze Christenheit / zeu-
 gens auch seine schrifftē / dz in viel jarn kein Lehrer
 gelebt / der die gewel des Papstumbs / desgleichen
 die Arrianer / Seruetianer / Widerteuffer / Liber-
 tiner vnd andere Sectē statlicher vñ mit grösserm
 ernst /

Wer Cal-
 uinus ge-
 wesen.

ernst vnd eiffer / als er / widerlegt hab. Darumb es
 zuerbarmen / daß schier ein jeder Bachant / der nur
 ein jar auff einer Vniuersitet gestudirt / vnnnd vom
 Caluino vnd andern gleichen rüstzeugen Gottes/
 nichts anderst weiß / noch wissen darff / denn was er
 von etlichen vnßinigen leuten hat hören plaudern /
 wann er auff die Cangel Kompt / an Caluino, Marty-
 re, Beza, Danæo, &c. will Ritter werden / dieselbige
 höchlich verlestern / vnd also den gemeinen einfelti-
 gen mann / der von diesen streiten nichts weiß / vnnnd
 die verantwortung derselbigen Lehrern nicht ge-
 hört oder gesehen / irremachen. Soll es dann nicht
 recht vnnnd Christlich seyn / da das Mandat vnser
 Gnedigsten Herrn solch vnbesüßte lestern / wie auch
 die partheyische Namen absetzt. Dann zur zeit S.
 Pauli / waren wol bey den Corinthern viel gewalti-
 chere irrthumben eingerissen / vnd wil dannoch der
 H. Apostel nicht haben / das sich jemand Paulisch
 nenne. Zur zeit Athanasij, der ein solcher gewaltiger
 Kämpffer gewesen ist wider die Arrianer / vnd so ein
 schön glaubens bekantnuß gestelt / haben sich die
 Christen nie Athanasianer genent / wie vnser ge-
 genheil sich Lutherisch nennet / vnnnd mit großem Schand.
 spot vnd verkleinerung der Euangelischen Kirchē /
 den Papisten den titel der CATHOLISCHEN einge-
 raume vnd folgen lassen.

Der ander grund vnnnd schein Osiani / wa- pag. 7.
 rumber meint daß einem eifferigen Prediger nicht
 zuverweisen / wann er die Calvinische lehr ernstlich
 auff der Cangel strafft / ist genommen auß dem vr-
 theil vnd vnwidersprechlichen sentenz dieses Car-
 dinals der Vbiquitet: Dann er also dauon redet /

Osiandri
zorn wi-
der die Po-
litische
Räht.

NOTA

Toms. 7.
Viteb.
Ein Lu-
therische
warnung
an Luc.
Osiander.

NOTA

als wann sein mund allein solte seyn ein regel der
warheit / vnd ist dermassen im harnisch / daß er kein
sanffmut / sonder lauter ernst wider die arme vn-
schuldige Calvinisten wil bewiesen haben / ja er ist
also encrüstet / daß er sich auch an die Politische vnd
welliche Räht macht / vnd will dieselbige auß allen
Canzleyen der Chur vnd Fürsten / vnd auß allen
Rathsheusern der Städten verbannen / dieweil
dieselbige seinem vorgebē nach / nichts guts / sonder
lauter Schaden practiciren. Da sollen billich alle
verständige Politische Räht diesem Hoffpractican-
ten Osiandro / vnd seines gleichen auff die garn ses-
hen / vnd fein mercken / wieder Antichristisch Geist
sich in ihnen reget / vnd was diese Beichtväter den
frommē Fürsten für seine Consilia geben / auch wo-
her die verbitterung / vnd vnbefugte verordnun-
gen in etlichen Fürstlichen Testamenten kommen /
nemlich nicht von dē Fürsten selbs / sondern von der
importunitet / von dem verhezen vnd angebē dieser
Practicanen / welche D. Luther sehr wol abma-
let in 2 Timot. 3: Sie sind freueler ohn alle forcht
Gottes / spricht er / als were es vnmöglich das sie
itren möchten / oder niemands verhanden / der sie
straffen würd: Dieweil sie sich auß allen richten ge-
zogen haben / ist kein ding daß ihnen fürkompt / daß
sie auch nicht frechlich vnd thürstig wagen dörffen /
wo sie nur raum vnd fug haben. Solche vntugend
nennen sie ZELVM VERITATIS ET IUSTITIAE,
wann dieser deckel fürgewendt wirdt / da hüte dich /
da ist gewißlich eitel freuel vnd thurst. Item: Sie
sind auffgeblasen / spricht Lutherus / da brüsten
sie

sie sich vnd sagen: Wer wil vns wehren? Wir sind befreihet / vnd von jederman außzogen / wir sollen richten vnd straffen / vns sol niemant richten noch straffen etc. Wer ist aber D. Osiander / vnd wann schon deren noch sieben weren / daß von wegen seines vrtheils / so viel vnschuldiger leut sollen verdampft vnd verbandt sein / oder warumb soll man mehr auff Osiandri, Flacij, oder des Schützē zu Wittenberg vrtheil gebē / als auff das vrtheil der thewre Männer Philippi Melanchthonis, Buceri, Crucigeri, Capitonis, Hyperij, Victorini, vnd andern Praeceptorē / ja auff das vrteil der allgemeinen Euangelischen Kirchen? Dann solt man heut in einer freien versammlung das vrtheil d' Euangelischen Kirchen anhören / würde sich finden / daß sie vnser Christliche lehr gut heissen / vnd aber vber Osiandrum vnd seine Consorten klagen / auch klärlich darthun würden / daß sie nichts richtigs von den H. Sacramenten lehren / vnd die vornembste Articul des Glaubens verkeren. Darumb auch diese Herrn / welche ein solches wol riechen / von keinem freyen Synodo etwas hören oder wissen wollen.

Warumb die Obiquitisten den freien Synodis so feind.

Der dritte vermeinte grund Osiandri wider die genanten Calvinisten / darumb man sie ohne schew verdammen sol / seind seine Censuræ, das ist / zum theil verkehrungen vnser lehr / zum theil solche anziehung derselbigen / die gar nichts wider vns beweiset. Gibt für / das die Stifter des Mandats den streit vom H. Abendmal verkleinern / als wann derselbige nicht von der gegenwart / sonder von der weise der gegenwart were. Das heist aber nicht verkleinern / endern / oder verkeren den hauptstreit.

Wo haupt streit.

streit/dann es weisens alle handlungen vnd schriff-
ten der vnsern/das sie nie die gegenwart vñ gemein-
schafft Christi geleugnet/sonder allein die leibliche
gegenwart in den irrdischen Elementen / vñnd die
mündliche niessung des natürlichen leibs Christi/
wie gleich im anfang dieses Streits auß den Actis
was sich D. Luther mit Zwinglio / Bucero / Deco-
lampadio vñnd andern auff der Conuocation zu
Warpurg den 3 tag Octob. Anno 29 verglichen/er-
scheint/das sie von der Person Christi / von der
Tauff / vñnd andern puncten eins worden / allein

NOTA. sey vnverglichen blieben: Ob der waare leib vnd
blut Christi leiblich im Brot vñnd Wein sey / etc.
Dann die vnsern allwegen bewiesen vñnd darges-
than/das die waare gegenwart vnd gemeinschafft
Christi / welche in der schrift gerühmet wirdt / sey
nicht in den irrdischen Elementen / sonder in vns
Christgläubigen zusuchen vnd zubetrachten / dem-
nach vns die verheissungen geschehen seind / vnd in
vns Christus als in seinen gliedmassen wohnen wil.
Ist auch zuerbarmen/das diese leuth so irrdisch vnd
fleischlich gesinnet/das sie meinen/es sey nichts war-
hafftig gegenwertig dann was sie in den Händen
haben / vñnd mit dem leiblichen mund empfangen/
als wann dem glauben vnd der seelen nichts gegen-
wertig were / oder der allmechtige Geist Christi
nichts zu solcher waaren gegenwart schaffen könn-
te. Vñnd darff der Hoffprediger Osiander diese of-
fenbare Calumniā wider sein gewissen widerholen/
als solten wir lehren / wir hetten gemeinschafft mit
den wolthaten Christi / aber nit mit Christo selbst/
daer

Da er mit seinen Consorten sehr wol weiß / daß eben die vnseren solchen irrthumb in dem Allemanno Lugdunensi vnd andern gestrafft haben / wie auch in den Vbiquisten dieser irrthumb zu straffen ist / das sie meinen / man könne ohn Christo / vnd außserhalb Christo seiner wolthaten / seines lebens vñ des glaubens theilhafftig sein / welches stracks ist wider die lehr Joh. 15 cap. Gleich wie die reb kan kein frucht bringen / sie bleib dann am Weinstock: also ir nit / ihr bleibt dann in mir / dann ohn mich könt ihr nichts thun. Also ist ferners zumerckē / das ob schon Osiander auß dem Consensu Caluini cum Tigurinis, vnd auß dem Beza etwas herauß zu zwacken sich vnderstehet / damit er gern beweisen wolt / daß sie die ware gegenwart Christi nicht bekant hetten / so macht er sich nur hiemit desto mehr zuschanden. Dann es sihet jedermenniglich / das er blind vnd taub sein müsse / wann er nicht sihet vnd höret / was ihm vnd seinen Consorten so offte geantwortet worden / vnd ob schon zu Stutgard oder Tübingen solche schrifftten der vnsern nicht dörfen gelesen werden / habens doch viel tausend andere gelesen / vnd sie selbs müssen gestehen / vnd lehrens auch mit vns / daß / wann man das wesen menschlicher natur ansihet / sey Christus mit seinem Leib an einem ort natürlich vnd wesendlich. Nun ist aber gewiß / das der Leib Christi auch in der persönlichen vereinigung sein natur vnd wesen nit verlieret / darumb er auch vmbgeschrieben bleibt. Wil aber Osiander die vnsern straffen / so straffer die artickel des Glaubens vnd

Irrthumb
Osiandri.

Jacobus
Andres in
der Pre-
digt zu Es-
ling. pag.
44.

vñ die H. schrift/welche zeuget daß der leib Christi
 gen Himmel gefahren / daselbsten sey vñnd nicht
 auff Erden. Darumb er auch vermög der schrift
 Coloss. 3. orts halben so weit von den irdischen Elementen
 1. Pet. 3. ist / als der Himmel von der Erden. Es haben
 Heb. 4. aber wol tausendmal die vnser richtig erkläret/
 daß es nicht folge: Christi leib ist orts halben im
 Himmel / vñnd nicht im brodt vñnd wein: Darumb
 ist er vns aller dings nicht gegenwertig. Dann er
 vns als vnser haupt gegenwertig ist/wie dann das
 haupt allen gliedern des menschlichen leibs gegen-
 wertig ist/ob es schon nit eben an dem ort ist/da alle
 andere glieder sindt. Also ein Prediger auff der
 Cangel ist allen seinen Zuhörern gegenwertig/ob
 er schon nicht in dem ort stehet / da sie alle stehen.
 Viel mehr ist vns der leib Christi gegenwertig/da
 wir in nach art der gnaden gaben/im wort der ver-
 heissung empfangen/vñnd mit ihme durch das star-
 cke band des H. Geistes vereiniget / also das er in
 vns vñnd wir in ihme leben. Solche weis der gegen-
 wart/dauon die ganze H. Schrift zeuget / wollen
 diese Theologen nicht erkennen oder mercken / in
 massen solche wahre tröstliche gegenwart von den
 vnsern so statlich außgeföhret/vñnd wider die calum-
 nien dieser Clamanten bekant worden / als vñnder
 andern lib. 4 Institutionum Caluini, cap. 17. Sect, 19.
 Vñnd in dem schönen büchlein Iosia Simleri, de vera
 Christi praesentia in Coena. Item/in den verantwor-
 tungen Bezæ wider Selnecker, wider Sanctesium Mo-
 nachum: wider tredecim viros Torgenses, vñnd sonst
 an mehr orten. Vñnd ist wunder/wie diese vnruwi-
 ge leut auff so viel erklärungen Bezæ so viel geplärs
 auff

Von der
 gegenwart
 Christi.

auff allen Cantzlen dauon machen / das er gesage
 hab / der Leib Christi sey so weit von den Elemen-
 ten des Abendmals als der oberst Himmel von der
 Erden ist / da doch Herzog Christoffel von Wür-
 tenberg / 2c. löblicher gedächtnuß / vnd Brentius in
 dem zu Elfsatzabern mit dem Cardinal von Lot-
 tringen gehaltenē gespräch im Februario anno 1562
 (wie das vberschickt Protocollum, so in der Chur-
 fürstlichen Cantzley vorhanden außweiset) ermel-
 ten Bezam mit diesen Worten verthediget haben:
 Herzog von Guise hat berichtet / welcher gestalt
 der Beza öffentlich geprediget / das so weit Himmel
 vnd Erden von einander: also weit wer auch der
 ware Leib vnd das Blut Christi von dem brot vnd
 wein des Nachtmals / vnd were nur ein geistliche
 niessung. Auff welches Herzog zu Würtenberg
 geantwortet / S. F. G. achten darsür / das ge-
 dachter Beza dieses crasso modo verstanden /
 vnd sein thema dahin gerichtet / des Pabstumbß
 grewel / in dem da vermeint wirt / den H E X X N
 Christum in das brot zu beschwehre / in das heuß-
 lin einzusperen / vnd folgendß zum spectakel he-
 rumb zutragen / vnd also den gefangenen Chri-
 stum dem Volck im Brot zu dem anbeten / für zu-
 zeigen / damit abzuleinen.

Das aber Oslander weiter klagt / die vnsern
 lehren / der Leib Christi sey weder himlischer noch
 irdischer weiß zugleich in vielen orten / ist eben so

Herzog
 Christoffel
 von Wür-
 tenberg
 entschul-
 diget Be-
 zam wi-
 der den
 Cardinal
 von Lot-
 tringen /
 vnd des je-
 zigen Car-
 dinals zu
 Stutgart
 lestern.

viel als wann er die anklagē wolte / die da lehren / der
 Leib Christi sey ein wahrer natürlicher Leib / der nit
 zumalein Leib vñ kein Leib sey : gewiß aber ist es / daß
 der HERR nicht widerwertige eigenschafften in sei-
 ner angenommen menschlichen Natur hat / vnd auch
 seinen Leib an jenem tag / in seiner höchsten Glori
 nicht auß vielen orten / sonder vom Himmel Kom-
 men wirdt / zu richten die lebendige vñnd die todten :
 vnd ist ferners gewiß / da er sein heiliges Abendmal
 eingesetzt / daß sein Leib nit zugleich an vielen ortē /
 sonder allein am Tisch bey den Jüngern gewesen :
 Item / nach der Auferstehung war er nit zugleich
 in dem grab / vnd außser dem grab / dann die Engel
 außtrücklich sagen : Er ist nicht hie / sonder ist auff-
 erstanden. Vnd sollen sich deswegen diese Claman-
 ten doch einmal ihrer groben offenbarlichen Calu-
 mnien schämen / als da Oslander pag 12 ferner für-
 gibt / daß wir durch das wort / Christus / allein die
 Gottheit Christi verstehen / Kan es aber doch mit
 einem Buchstaben nicht beweisen / sonder bekennet
 selbs mit allen seinen Consorten / daß wir lehren
 vnd glauben / wir seyen des Leibs Christi theilhaff-
 tig / vnd daß wir stets führen den text Johan. 6 von
 dem lebendigmachenden Fleisch vñnd Blut Ihesu
 Christi / welcher text freylich nicht von der Gott-
 heit / sonder von dem für vns gegebenen Leib Chris-
 ti / vnd also von dem hauptstück vñnd schatz des Sa-
 craments lauter. Danun der ware vñnd natürli-
 che Leib Christi vermög des texts Johan. 6 war-
 hafftig gessen wirt / vñnd aber nicht gessen werden
 möcht / wo er vns nicht gegenwertig wer / folget vn-
 widersprechlich / daß zu der wahrē niessung des Leibs
 Christi

Luc. 24.

Christi/die leibliche gegenwart in den irdischen Elementen nicht erfordert werde / wie diese leuth von uns schreien / das wir keine wahre gegenwart des Leibs Christi glauben / dieweil wir nicht halten / das sein Leib leiblich im brot seye. Das ihm aber wehethut / da wir von ihnen sagen vñ klagen / wie sie singen / schreiben vñ lehren / der Leib Christi sey im brot verborgen / können wir nichts dafür: Dann wann sie es nicht grob meinen / sollen sie nicht grob mit dem Papst Nicolao reden / Naturaliter, corporaliter, sensualiter. Item / was der Priester in der hand hat vnd in mund gibt: Item / da das brot ist / da ist der leib Christi / wie ein Kind in der wiegen / gelt im seckel / Wein in der kandten / wie dann durch solche gleichnussen ihre Scribenten die wort des Abendmals erklären / sonder solten von verbergung des Leibs Christi anderer gestalt nicht / dann wie die Alten von diesem geheimnus reden / schreiben: das er nemlich den eusserlichen sinnen verborgen sey / dieweil er irwendig vnd geistlich genossen / da die eusserliche zeichen eusserlich vnd leiblich empfangen werden.

Der vierte eingewante grund / durch welchen Si ander sein schreien vnd lestern wider die Calvinisten zubeschönen vermeint / ist dieses nichtig für geben / als wann wir uns von der Augspurgischen Confession abgesondert / vnd vnser lehr darin verworffen were: Da es doch weltkündig vnd von den vnsern oft berichtet worden / wie sie sich Anno 30 / nicht zwar von der Augspurgischen Confession / sondern allein von dem Artickel vom Nachmal / der sonderlich in der ersten Apologi gar Pápstisch

pag. 46.

Wer von der Augspurgischen Confession sich abgesondert hab.

gelautet / auch deswegen von den Pöpstlichen ap-
 probirt worden / gesondert haben / darumb auch
 derselbige Artickel ein Jar hernach wol bedächt-
 lich corrigirt vnd geendert / dadann die von Straß-
 burg / wegen solcher erklärungs vnd Concordi / die
 Anno 36 zu Witteberg gefolgt ist / sich zu der Aug-
 spurgischen Confession / als die mit ihrer Confessi-
 on vber ein kam / öffentlich bekennet. In massen die-
 se ding ausführlich von den vnsern in Historia Au-
 gustanae Confessionis & eius Supplemento auß der
 Schweizer schreiben an Lutherum / vnd auch auß
 der handlung Buceri vnd Capitonis mit dem Raht
 zu Bern dargethan worden. Ist derhalben ein
 grundloses gedicht Osiandri / daß er schreibt / die
 vnsern haben nicht viel nach der Augspurgischen
 Confession gefragt / biß anno 55 / damit sie in Reli-
 gions frieden möchten begreifen werden. Denn
 wie es vmb den Religion frieden / so anno 55 / nicht
 zwar erst auffgerichtet / sonder vernewert / vnd in
 etlichen puncten vermehrt ist worden / in warheit
 beschaffen sey / daß mag sich Osiander auß dem /
 was am end der Augspurgischen Confession Histo-
 ri / zur Newstatt außgangē / hie uon tractirt wirdt /
 erlernen: Alda er befinden wirdt / das der erst Re-
 ligions fridstand mit den Papisten / seinen anfang
 zu Schweinfurt Anno 1532 gehabt / in welchem
 fridstand die vier oberländische Stätt / bey ihrer
 zu Augspurg vbergebener Confession / wie die
 selbe zu der zeit in ihren Kirchen im gebrauch war /
 als der Augspurgischen Confession verwandte /
 von den Keyserlichen Commissarien sind ange-
 nommen / auch hernach allweg bey solcher ihrer vn-
 verender

Vom Re-
 ligions fri-
 den.

verenderter lehr bey allen nachfolgenden wider
 erneuerten Religionsfrieds handlungen / vn-
 außgeschlossen blieben / als zu Franckfurt anno
 1539. Item zu Speyer vnnnd Regenspurg bis auff
 den Schmalkaldischen Krieg / in massen dann
 auch damals der Herzog von Württemberg / dessen
 Theologen zu derselbēzeit von der Vbiquitet nichts
 wußten / vnd es viel mehr mit vnsern Kirchen hiel-
 ten / in solchem Religionsfried begrieffen war / wie
 dann der hernach erneuerte Religionsfriede / das
 mit Slander so sehr truzet / was den Artickel
 von beiden Religionen / so in dem Religionfrieden
 begrieffen sein sollen / anlangt / von wort zu wort
 auß dem vorigen Franckfurtischen temporal Reli-
 gion friedstand genommen ist. Wann nun der
 Anno 1555 widerernewerter Religionfried bey dem
 verstand der vorigen auffgerichteten / vnd etlich mal
 vernewerten Religionfried ständen blieben / so ist
 es gewiß / daß die vnser nicht außgeschlossen / son-
 der viel mehr die Vbiquitisten / vnnnd newe Slan-
 dristen / welche von der Concordi Lutheri vnd Buceri
 zu Wittenberg Anno 36 auffgerichtet / vnd von der
 Augspurgischen Confession zu den Streitschriff-
 ten Lutheri / vnd zu der in keinem Religionsfrie-
 den begriffnen Vbiquitet getreten sindt / wie denn
 schon allbereit die Pápstische ständ / vnd mehr dann
 der halb theil der Luangelischen ständ erkennen
 vnd zeugen / daß solche lehr / Das der Leib Christi
 in allen orten sey / wie die rechte hand Gottes / in
 der Augspurgischen Confession weder gesetzt / noch
 gemeint sey / vil weniger findet sich in gemelter Con-
 fession oder in dem Religionsfrieden dieser newe

Die Vbi-
 quitet aus
 dem Reli-
 giös friedē
 außge-
 schlossen.

Newer
 Slander
 auf
 mus.

Osiandrismus, da er Osiander in seinen zwoen Predi-
gen geschrieben: Wer keinen andern grund hette
als die wort der einsagung / vnd nit glaubte / der
leib Christi wer vor im brot / wie auch allenthalbē /
der möcht vber nacht Zwinglisch vnd ein Sacra-
mentirer werden. Sonst was den Religionsfriedē
anlangt / derselbig kan zwar niemands helfen wi-
der die friedhässige Clamanten, quibus nunquam est
pax, spricht Esai. 57 cap. Vnd haben vnserer Kir-
chen in irem manigfaltigen creutz vnd elend / wie
noch etliche vorneme Ständ des Reichs / sich viel
mehr des frieden Gottes vnd seiner gnaden / dann
eins solchen Religionfriedens müssen getrösten.

Die gegē-
lehr im zeh-
henden Ar-
ticul Aug-
spurgisch-
er Confes-
sion.

Vbiquiti-
sten vnd
Flaccia-
ner sind
solche gäst
die den wirt
vertreibē.

Was weiter Osiander von der gegenlehr / die
im zehenden Artickel der Augspurgischen Confessio-
on verworffen wirdt / herfür bringt / dasselbig ge-
het vns gar nicht an / sonder die Widerreuffer vnd
die jenigen / so die Sacrament vernichtigen / wie es
außdrücklich gemeldet wirdt in dē Reichs abscheid-
der damals auffgericht ist worden. Er Osiander
selbs bekennet / daß wir vnserer lehr von den H. Sa-
cramenten / durch gewisse fragstück / so der listige
Mañ einē Fasnacht rock vergleicht / auß der Aug-
spurgischen Confession vnd Apologi bewiesen vnd
bestetiget haben: Spricht aber hönisch / das wir
allein der Augspurgischen Confession sein wollen /
vnd es sey ein böser Gast / der den Wirt vertreib.
Wer thut aber solches / dann eben die Vbiquitisten
vnd Flaccianer: die solche böse vnartige Gäst sind /
daß sie den Wirt / das ist / den authorem Augustanæ
Confessionis, Philippum Melanchthonem verspottē /
schmehen /

schmehen/vnd auß der anzal der reinen Lehrer setzen vnnnd vertreiben: Item durch ihre neue Normam vnnnd eingewandte erklärang der Augspurgischen Confession/darinn sie neue Puncten/die in derselben nicht stehen/herfür bringen/vnnnd ihre gründ nicht auß der Apologi/sonder auß den streitschriefften Lutheri holen/damit verkleinern vnnnd stossen sie auß die Augspurgische Confession vnnnd Apologi. In summa sie sind eben diejenige/die auß mancherley farben vnd tüchern einen rechten Fassnacht rock in ihrem Concordibuch zusammen geflickt haben/in dem sie so mancherley Symbola,vnnnd vnderchiedlicher Authorum schriefften/auch ganz widerwertige glossen in ein buch zusammen gerasselt haben/die vnsern aber auß gleichen vnnnd eines Authoris schriefften/nemlich auß der Augspurgische Confession, dero Apologi vnd Franckfordischen abschied/als ein schöne Harmoniam/vnnnd den rechten safft derselben bewerten allgemeynen schriefften der alten Ständ Augspurgischer Confession/in gewisse klare fragstück gefasset/vnnnd ein schönen Kranz auß vielen schönen blumen vnnnd perlein gemacht/wie dan D. Osiander in demselbigen auszug nichts dann das zu tadeln weiß/(vnd muß doch gestehen/das es die eigene offte widerholte wort der Apologi sind:) das die Sacrament ohne glauben vnnütz vnd vergebliche Spectackel seyen/wie der Türcken beschneidung/oder der Heiden opffer. Das er aber bald hernach für gibt/diese frag: Ob man die junge Kinder täuffen sol/stehe nicht in der Apologi/antworten wir/das aber die erörterung vnd die Resolution

lation derselbigen frag / vnd eben die antwort / so
 in ermelten fragstücken gesetzt / stehe in der Apologi
 vnd auch in der Repetition. Da erzeiget sich warlich
 das giftig hertz dieses Manns / daß er bey solcher
 klaren / im wort Gottes vnd der Augspurgischen
 Confession gegründten lehr / vns gern in den ver-
 verdacht bringē wolt / als lehrten wir / der Kinder-
 tauff / were ein lauter vergeblich spectackel / dieweil
 nach vnser lehr (wie er berichtet) die kleine Kinder
 noch nicht glauben / welches ein nichtige folg vnd
 consequens ist. Dann erstlich wie D. Luther selber
 schreibt im grossen Catechismo von dem Kinder-
 tauff: Es ligt vns nicht die größe macht daran / ob
 der getaufft wirdt glaub oder nicht glaub / den da-
 rumb wirdt die tauff nicht vnrecht / dieweil (spricht
 er) des Tauffs würdigkeit auff Gottes befelch vnd
 ordnung / nicht auff dem glauben stehet. Darnach
 ist zumercken / wie Osiander vns gewalt vnd vn-
 recht thut / da er die leuth bereden wil / als lehren
 wir / daß die kleine Kinder allerdings vngleubig
 sind. Dann gleich wie sie nicht aller dings vnuer-
 nünfftig sind / ob sie schon die vernunft noch nicht
 brauchen können / also lehren wir / daß sie nicht al-
 lerdings vngleubig / ob schon der glaub sich in jnen
 nicht wie in den gewachsenen erzeuget / sonst haben
 sie in ihnen den samen des glaubens vnd der buß
 durch heimliche sonderliche würckung des H. Gei-
 stes / vnd werden H. Geist hat / der hat die wurzel
 des glaubens / vnd aller tugenden / das seind die ei-
 gene wort Caluini lib. 4 Institution. cap. 16, Sect. 20.
 vnd Petri Martyris in 7 caput 1. Cor.

Welcher
 gestalt die
 kleine Kin-
 der gleu-
 big.

pag. 17.

Was sonst Osiander bey diesem puncten von
 der

der Augspurgischen Confession weiter meldet / daß die Lutherische die vnseren nie für Brüder haben wollen erkennen / muß er allhie die Lutherischen vndercheiden / wie vorzeiten ein vndercheid gewesen ist / zwischen den rechtgleubigen Jüden / vnd denen die auß der beschneidung waren / oder die zelotæ genent worden sind. Solche zelotæ vnd vnfreundliche Lutherische seind Amsdorff gewesen / wie noch jetzt die Vbiquitisten vnd Flacianer.

Zweiterley
Lutheri-
schen.

D. Luther aber da ihm solche leucht in den ohren nicht gelegen sind / hat die vnseren für brüder erkent / wie es klärlich erscheint auß einem sendbrieff an die von Straßburg / da er also schreibt: Ich bitte ewere Euangelisten / meine lieben Herren vnd Brüder / daß sie euch vom Luther vnd Carlstadt auff Christum weisen. Solches erscheint auch auß der brüderlichen schrift Lutheri an die Schweitzer / welche steht Tom. 6 Ienensi, Tom. 12 Vvitteb. Es haben auch vor dem erneuerten streit von der Vbiquitet Brentius, Vitus Theodorus, Iacobus Andrea dem Caluino freundlich als einem brüder geschriben / wie auch nicht weniger Melanchthon bis zu seinem seligen abschied / Caluino, Bullingero vnd Hardenbergio gethon. Zu dem ist offenbar / vnd weiß Oslander als ein Hoffprediger (welches ohne zweiffel ihm in seinem Cainischen Hertzgen wehethut / daß die Lutherische Fürsten vnsern Religions verwandten Fürsten als brüder zuschreiben / vñ halten wir sie für so redlich / als Teutsche Christliche Fürsten / daß ihnen recht ernst sey / vnd daß sie vil mehr dem Apostel Iohanni, dann dem Osandro folgen werden / da S. Johannes im 3 Cap. seiner

Tom. 2.
Vvitteb.
pag. 57.

ersten Epistel also schreibt: Das ist die bottschaft
die jr gehört habt von anfang / dz wir vns vnder
einander lieben sollen / nicht wie Cain / der von
dem argen war / vnd erwürget seinen bruder.

Pag. 17.

Nach dem nun der zornige giftige Man / sei-
nen zorn also vber vns vnd das Christliche Man-
dat vnseres Gnedigsten Herrn / der Churfürstli-
chen Pfalz Administrators zc. gnugsam außge-
gossen / beginnet er abermals vber vns zu klagen /
als wann in vns keine sanfftmüt seye. Dann seinem
vorgeben nach / werden reine Prediger vñ Schul-
diener von ihren diensten durch die genante Cal-
uinsten gestossen / vnangesehen / daß die Lutheris-
sche Prædicanten noch in keinem öffentlichen Syn-
odo vberzeugt vnd verdamt worden sind. Diese er-
inerung aber solt Siander ihm selbst thun / der mit
seinem anhang stets schreiet vnd warnet / man sol
kein Calvinisten in diensten dulden / wie sie auch in
vielen orten das Christlich begrebnuß den vnsern
versaget / vnd zur zeit der verfolgungen / die in En-
gelland vor 28 Jarn gewesen / haben dise Claman-
ten solche sanfftmüt den Armen / mit Weib vnd
Kindern verfolgten / vnd im harten Winter ver-
triebenen Christen / bewiesen / daß sie in etlichen or-
ten schier hungers gestorben / vnd weder Herberg /
Platz / noch mitleiden haben finden können / wie
dann auch vor sieben jaren alle vnser Theologen
oder Prediger / ohn anzeig einziger erheblicher vr-
sach / von ihren lieben Schäßlein vnd zuhörern /
auff anhalten diser neuen Cardinal / verstoßen / vñ
nicht allein in keinem Synodo / sonder auch in keiner
Dispu

Die Vbi-
quitische
vnd Osi-
andrische
Sanffts-
müt.

Disputation/Keinemgespräch zc. gehört / viel weniger vberwiesen worden sind / ja es ist der neid vnd groll etlicher Priesterknecht im land wider etliche beurlaubte Kirchendiener so groß gewesen / daß sie denselben (zweiffel frey / ohne vorwissen der hohen Oberkeit) alle schmach vnd schmäbliche Frondienst aufserlegt / vnd etwan den Nachrichtern zudiener genötiget haben. Das ist die Ubiquitetisch Osiandrische sanfftmüt / vñ das sind die bescheidene leut / die von andern sanfftmüt fordern / deren wir sonst viel viel exempel ihrer vnarmherzigkeit vnd vnfreundlichkeit erzelen möchten / wo es die that in vielen orten / ja alle ihre predigten / schriften vnd geberden nit genugsam bezeugten. Ob aber vnser Gnedigste Herrschafft grössere sanfftmüt brauchen / vnd väterlicher handlen köndte / als sie thut / geben wir allen menschen zu vrtheilen / wie auch J. S. G. sehr wol leiden mögē / daß alle verständige auffrichtige Christen darüber vrtheilen. Den vnangesehenen daß diese Pralaten im land in keiner Oratio / gehaltenē Reichpredigten vnd Gebetten / da sie viel geringerer personen gedacht / ihrer S. G. nicht mit einem wort meldung gethan / sonder viel mehr auff dieselbe gestochen / vnd nicht vor dieselbige bitten wollen / biß es ihnen auß der Cangley befohlen worden: Darneben aber in allen ihren Predigten vnd Gebetten ein verbittert Hertz wider ihre S. G. erzeiget. Nichts desto weniger / haben S. S. G. mit grosser gedult vnd väterlicher sanfftmüt / dieselbige nider person / in J. S. G. gemach vnd sonst / da sie schon zimlich vngestüm / ihrer art nach / sich erzeiget / angehört / sich erbotten / durch S. S. G. Prediger

Don dem
sanfftmüt
gen väter
lichen Pro
cess Her
zog Johan
Casimirs /
der Churf.
Pfalz Ad
ministra
tors / zc.

die Calumnien wider vnser Christliche Lehr abzu-
 leinen / aber der gegentheil in ein mündlich ge-
 spräch / als es von inen in der Cangeley begert war /
 sich einzulassen mit zimlichem trutz abgeschlagen /
 vnd viel Conditiones vnd bedingungē erst fürsclan-
 gen wöllen. Sind auch so schew vnd friedhässig ge-
 wesen / daß sie auff vnser erbieten vnd der Oberkeit
 befelch mit vns in Seniorraht zusitzen / oder das ge-
 ringste mit vns zuthun oder zuhandlen difficulte-
 tirt / vnd mit harten worten geantwortet / sie wol-
 ten mit den Vngläubigen nicht ein Joch ziehen.
 Vnd haben auff allen Cangeln zu Heidelberg / vnd
 in der Pfalz mit grossen ärgernuß vieler Vnder-
 thanen allerley beschwerliche vngegründte leste-
 rungen / anziehung der Personen / daß sie vns auch
 mit Jüden vnd Türcken verglichen / vnd daß wir
 ein Christlichen gruß nicht werth weren / öffent-
 lich vnd gleich ohne schew verlauten lassen / daß ihr
 S. G. nicht vnzeitig verursacht mehr ermelt Christ-
 lich Mandat von abschaffung solcher greuelichen
 auffrührischen calumnien mit gehabtem reiffem
 raht aller hohē Räht zu publiciren. Vnd solchs hat
 hiebevorn Herzog Heinrich von Braunschweig der
 iunger / in S. S. G. vnd des ganzen nider Sächsischē
 Kreiß namen anno 62 gethan / wie in dem damals
 gedruckten vnd publicirten Edict dise Wort stehn:
 Daß die Theologen / Pfarherrn vnd Prediger /
 Schulmeister vnd andere / von dem hochwürdi-
 gen Sacrament des Abendmals vnser S. G. X.
 X. Jesu Christi nicht anderst reden / lehren / o-
 der

Edict Her-
 zog Hein-
 richs von
 Braun-
 schweig/
 vñ des ni-
 der Säch-
 sischen
 kreiß.

der predigen sollen/dann wie Christus selbst / die
 Euangelisten/der H. Apostel Paulus / die Aug-
 spurgische Confession vnnnd Apologia dauon re-
 den/2c. Solget hernach inn demselbigen Edict/
 welches den 25 Iuni) datiret/ also: Wann dann das
 vngbürllich schelten vnnnd lestern auff den Gan-
 geln/auch condemnierung anderleuht / die noch
 nicht gehört noch irrthums überwunden seyn/
 frommen Christlichen Predigern nicht geziemet/
 auch solch fürnemmen nicht allein wider Gottes
 befehlch / vnnnd die Christliche liebe ist / sonder viel
 mehr dardurch grosse widerwertigkeit vnnnd mis-
 trawen zwischen hohen vnnnd nidrigen Stands
 Personen / auch lezlich verachtung aller Religi-
 on entsteht / wie leider solch vbel mit grossen
 schmerzen zuvernemen: So gebietē wir ferner in
 krafft obberürts Lüneburgischen kreis abschieds/
 hiemit allen vñ jeden Pfarrherrn/Pastorn/Seel-
 sorgern vnnnd Predigern / dasz sie sich befleissigen/
 das wort Gottes lautter vnd rein ohne einige ver-
 felschung dem volck fürzutragen/vnd viel Seelen
 dem H. X. X. N. Christo zuzuführen/vnnnd Gottes
 ehr/vnd der leuth seligkeit zu befürdern/vnnnd sich
 des bissher geübten scheltens vnd lesterns / priuat
 personen/oder Vniuersiteten/die keines irrthums

Wobletze
 die Streck
 schriften
 Lutheri.

überzeuget / oder wie recht / durch ordenlich erkant-
nus nicht überwunden / gänzlich enthalten / bey
vermeidung der verweisung / oder anderer gebür-
lichen leibstraffe / nach gelegenheit der überfah-
rung.

Da aber einer vermeinen würde / das jemand
mit vngesunder lehr behafftet / so hat er densel-
bigen nach der lehr Christi brüderlich vnd freundt-
lich zuermanen / oder da er dauon nicht abstün-
de / die sach zuuerhör der ordenlichen Obrigkeit /
vnd gebürlichen cognition vnd erkantnus zube-
fürdern / vnd sich der bescheidenheit zuhalten / die
Gottes wort vnd gebrauch der alten Christlichen
Kirchen gemess ist / etc. Item / das wir in vnsern
Kirchen mit vngrunde also verlestert werden / wie
vnser Widersächer vorgeben / hat Herzog Chri-
stoff von Württemberg / Christmilter gedechtnus /
neben dem Brentio in dem gehaltenen gespräch zu
Elzaszabern mit dem Cardinal von Lottringen /
gezeuget. Dann da der Cardinal vom hochermel-
ten Herzogen von Württemberg wissen wolt / was
doch der Deutschen Confession oder Religion wer /
vnd ob sich dieselbe in allem mit den Gallicis ministris
vergleichen thet / gaben seine S. G. diese antwort /
wie wir sie von wort zu wort auß dem Autentico
Protocollo, so in der Churfürstlichen Cangley vor-
handen / vnd zu derselben zeit vom Herzog zu Würt-
temberg dem Pfalzgraffen Friderich dem dritten
Chur-

Herzog
Christof-
fels von

Churfürsten zugeschickt / verzeichnet wie folget / 2c. Wärtenberg meis-
nung von
den Fran-
zösischen
Kirchen
wider Dsi-
andrum.
Es wußten sein Herzog Christoffels S. G. sich
keines vnderscheids zu berichten / darinnen die
Gallici Ministri mit der Augspurgischen Con-
fession discordirten / dann in dem Artikel des Her-
ren Nachtmals / wer aber dermassen geschaffen /
das verhoffentlich ein gute vergleichung zutref-
fen sein möchte: Dañ mehr der streit in verbis wes-
re / dann das man sonst so weit von einander
sein solt.

Was ist denn das für ein vnbescheidenheit /
ja ein Hellscher zorn / daß die Ubiquitisten das
Edict vnser Gnedigsten Herrn / jetzt mit dem
Edict Ahasueri / jetzt mit dem Interim / jetzt mit
dem Alcoran vergleichen / vnd vnser lehr gar für
Teuffisch halten: vnd damit jedermenniglich sehe /
wie vnser Gnedigster Herr der Churfürstlichen
Pfalz Administrator, etc. ja nicht gelinder hat
können handeln / ist zu mercken / daß etliche Pres-
diger / als vnder andern die zu Sppenheim / wie es
die Käht vnd Amptleut / vñnd ein ganze Gemein
daselbst wissen / so außgelassen vnd frech gewesen /
daß sie in öffentlicher Predigt / nach des Churfür-
stens Ludwigen etc. absterben / schimpfliche / vff-
rührische / Gottlose reden von vnserm Gnedigsten
Herrn / dero S. G. geliebten Herrn Vatter / Fraws
en Mutter / die in Gott ruhen / von sich auff der
Canzel on schew außgegossen. Item / das die Cal-
uinische lumpenleut / vñ des Teuffels mit leib vnd
seel

seel seyen / wie es die Acta so bey Ch. Canteley ver-
 handen genugsam vnd öffentlich außweisen. Da
 bitten wir den Osiandrum / das er zu Stutgard / im
 land zu Sachsen / Hessen / oder sonst wo er wil / fra-
 ge / wann solche Prediger bey ihnen weren / die ihre
 lehr vnd Herrschafft gleicher gestalt verlesterten /
 wie man mit ihnen vmbgehen / vnd ob es bey einer
 schlechten abschaffung verbleiben würde. Nun hat
 man nicht allein nichts strengs wider solche offens-
 bare lesterer fürgenommen / sonder sie zuvor güt-
 lich gehört / sie ihrer lesterungen vberwiesen / vnd
 da sie sich halsstarrig vnd mutwillig erzeiget / ihr
 etlich wenig beurlaubt / doch gewisse frist vnd ter-
 min zum abzug gegeben. Was dünckt den Osiand-
 rum von solcher sanfftmüt / oder was hat er für
 mangel an diesem proceß; meiner er dann / daß man
 erst ein Synodum versamen muß / so offt man ein
 halsstarrigen öffentlichen Calumniatorem vnd ei-
 nen auffrührischen Lesterer abschaffen sol: Das
 Mandatum beweiset hell vnd klar / das sonst den
 Lutherischen Predigern bey vns erlaube / ihre
 lehr (wie sie dieselbigen verstehen) auß iren Catechi-
 smis zupredigen / vnd die gegenlehr / wo sie solche
 nur trewlich anziehen / so gut sie es können / zu wi-
 derlegen / allein sollen sie die Calumnias, die Perso-
 nalia, vnd andere vnerbewliche ding meiden / wie
 darumb auch J. S. G. auß sonderm Christlichem
 verstand vnd eiffer freye publicas disputationes an-
 gestellet / vnd wir vns offtermals zu freundlichen
 gesprächen erbotten / damit dieser streit ordenlicher
 weis erörtert / vnd inn diesen schweren trübseligen
 zeiten fried in der Kirchen / so viel immer möglich /
 erhalten

erhalten würde. Vnd hiemit sey abgeleint / was D^s siander zur behauptung seiner vñ anderer lesterungen / wider die reine Bekenner der Augspurgischen Confession / die er Calvinisten nennet / eingewant hat. Er wolt aber auch gern durch ein Recrimination vber vns Klage / als ob wir inē mit vngrund vil ding zulegen vñ andichten solten: Dasselbige aber in dem Mandat / (welches er partheyisch nennet) vns nicht verbotten / da er doch weiß / daß in solchem Mandat beiden theilen die bescheidenheit auffgelegt / vnd alles calumniiren in gemein verbotten. Daß aber die ding in specie nicht erzelt werden / davon D^s siander pag. 22 schreibt / geschicht deswegen / daß es keine calumnien / sonder offenbare irrthumben vñnd abschewliche reden sind / die sich in ihren schriften finden / vnd ihnen vielmaln von etlichen Ständen der Augspurgischen Confession / als den Newstädtischen Pfalzgräffischen / Anhaltischen / denen zu Bremen / den gelehrten zu Straßburg vnd andern / mit erinnerung der Bücher vnd bletter klärlich dargethon worden / als nemlich / daß Brentius geschrieben: Christus hab ein ewige / vñ ein mitgetheilte Gottheit / in seinē büchlein de Maiestate Christi, pag. 91, vnd in Recognitione, pag 90, Christus der Sohn Gottes habe durch die Göttliche Maiestet / nicht allein der ewigen Gottheit / sonder auch der Gottheit / die er dem Sohn des Menschen in erfüllung der zeit mitgetheilt / Himmel vnd Erden erfüllet.

Ob wir die Lutherischen calumniiren.

Abschewliche reden der Ubiquitisten.

Item / daß auß ihnen ein promouierter Doctor Theologiae, zu Tübingen / in gegenwart eines fürtrefflichen Fürsten / vnd in beysein zweier fürnem

men Theologen (so noch bey leben) öffentlich gesagt (darüber sich die zuhörere nicht wenig entsetzt haben sollen:) Daß Christus so wol in Herodias leib/als im leib der Jungfrauen Maria gelegen sey: haben es die jertzige Theologen zu Bremen in öffentlicher schrift bezeuget/vnd seynd bey leben/anders wissen wir nicht/die beyde Doctores Theologiae/vnd andere die dabey gewesen.

pag. 105.

Cöcordia
discors.

Item hat Brentius im Buch von der Maiestet Christi pag. 24 geschrieben/das eines jeden menschen natur / der jetz im Himmel ist / seye dem Sohn Gottes einuerleibt/vnd mit jm in einigkeit der person verbunden. Item/das der Leib Christi in allen winkeln / Steinen / Bierkanten sey/hat Parlimonius Osiandri mitbruder/vnd Warbachius in seiner letzten schrift/ohne schew geschrieben / volget auch solchs auß der lehre Osiandri vnd der Ubiquitisten/dennach sie lehren/der leib Christi sey in allen orten wie die rechte Hand Gottes. Da sihet man wie diese leut/so andern ihre Concordia auffdringen wollen/mit einander/ja mit sich selbs concordiren/vnd vber ein stimmen. Wie sie auch heut/von der außgiessung der Göttlichen Maiestet in die Menschliche natur nichts wissen wollen / da doch solchs ihr Patriarch Brentius geschrieben/Recog. pag. 16. 29. 30.

Item/das sie die Menschheit Christi fast nach des Eutychem vnd Schwencckfelds lehr tilgen / volget schließlich auß ihren seltsamen reden/als da D. Luecher schreibt/inn dem Buch / das die wort noch fest stehn:

stehn: Christi fleisch ist auß allem fleisch gesöndert/
 vnd allein geistlich fleisch / nicht auß fleisch / sonder
 auß geist geboren. Item / daß sie im Concordibuch
 mit Luthero schreiben / daß der Leib Christi nach
 der dritten weise / das ist / nach art der Gottheit al-
 lenenthalben sey wie Gott / vnd wo Gott ist. So lau-
 tet diß daselbst auch gar Marcionitisch / da sie mit
 Luthero schreiben / daß das fleisch Christi durchs
 brot fehret / wie ein Klang durch bret vnd lufft / vnd
 vnser gesicht durch lufft / glas / liecht / zc. Inmassen
 sie auch dem H^{erren} ein vn sichtbaren / vnd so sub-
 tilen leib zueignen / welcher fürwar nicht der ist / der
 für vns im leib der Jungfrauen geboren / vnd für
 vns am stammen des Creuzes gecreuziget wor-
 den. Stinckt des wegen abermals solche S^{ch}andri-
 sche lehr nach dem geist des Antichrists: dan spricht
 S. Johannes / das ist der geist des Widerchristis /
 der nicht bekennet / daß Jesus Christus sey ins
 fleisch kommen. Fleisch aber heist nicht ein vnend-
 lichs vn sichtbars wesen / sonder vnser menschlische
 dürfftige natur / warer menschlicher natürlicher
 leib / vñ ware menschliche natürliche seel. Also habē
 ferners schier alle Kirchē der Christenheit dise leut
 gewarnet / daß wo nach irer lehr eine andere natur /
 als die Göttliche der Göttlichen eigenschafften fes-
 hig were / so könt man nicht mehr die Göttliche na-
 tur von der Menschlichen / vnd den Schöpffer von
 dem Geschöpff vnder scheiden / dann was einem an-
 dern gemein vnd mitgetheilt wirt / kan kein ware
 eigenschafft heissen: Als vnder andern vnder schei-
 det sich Gott der H^{erren} von allen Creaturen / al

Antichri-
stische lehr.

1. Iohan. 4.

W^{as} fleisch
sey bey
Johanne.

so Jerem. 23. Bin ichs nicht / der Himmel vnd Erden fülle / spricht der Herr: Dise Lehrer aber dörfen schreiben / daß Christus alles mit seinem fleisch füllet / vnd verkehren den spruch S. Pauli Ephes. 4 / welcher nicht lauter von dem fleisch Christi / sonder wie D. Luther selbst erkläret / von der würckung / krafft vnd gaben / vnd wollen doch nichts desto weniger diese Herren die fromme Fürsten vnd andere einfeltige bereden / daß sie die vbiquitet nicht lehren. Da aber dem also / warumb schreiben sie dann in ihrem Concordibuch: Wo du einen ort zeigen würdest / da Gott were / vnd nicht der Mensch / (vnd wie sie sich vor erklären) nach vnd mit seiner angenommenen Menschlichen natur / so were die person zertrent. Item sie schreiben / Er erfüllet alles warhafftig vnd allenthalben / nicht allein als Gott / sonder auch als Mensch gegenwertig. Item / daß solle man gar nicht leugnen / wir wissen dann zu beweisen / daß Christileib allerdings nicht mög seyn / da Gott ist. Item / sie berufen sich öffentlich auff Luthers streitschriften: Luther aber in dem Buch / daß die wort fest stehen / schreibt / Wo die rechte Hand Gottes ist / da muß Christileib vnd blut sein. Die rechte Hand Gottes aber spricht er / ist allenthalben / in jedem Körnlein / auch in dem geringsten baumblat. Vnd Brentius in Recognitione hat dörfen schreiben / das inn dem Himmel / dahin Christus gefahren / auch die Hell vnd der Teuffel seye: Heißt daß Christum nicht
von

Sic Ambrosius epist. 10. Hilarius in Psalms. 56.

Wie die vbiquitet im Concordibuch steckt.

von seinem thron absetzen: Dann ja der Thron des
 HERRN weder die Hell / noch die irdische Ple-
 menten sind / sonder wie die ganze schrift zeuget /
 vnd wir bestendiglich lehren / ist der Thron der Wa-
 iestet Gottes droben im Himmel. Es siehet auch
 jeder meniglich / daß auß irer lehr der grund der Päs-
 pftischen Abgötterey mit den hostien bleibt. Dann
 es werde das brot verwandelt oder nicht / wann der
 leib wesentlich vnd leiblich in oder vnder dem brot /
 oder nach dem Buchstaben / das brot der leib Chris-
 sti leiblich ist / so folget ohn widersprächlich das an-
 betten des brots / welches zwar Luther / wie auch
 das auffheben des Sacraments / in etlichen schrift-
 ten öffentlich verthedigt / vnd noch heutigs tags
 in etlichen Lutherischen Kirchen gespürt vnd ge-
 halten wirt. Können also ferners die Consubstan-
 tiation / vnd daß sie Christum ans brot binden / nit
 leugnen / weil sie stets diese art zureden brauchen /
 er hab sich an das brot mit seinem wort gebunden.
 Item / es sey im Abendmal fleisch brot vnd leibs-
 brot / vnd daß in vnd mit der substanz des brots
 seye das wesen / vnd die substanz des leibs Christi.
 Daß sie aber diß alles so subtil verstehen wollen:
 vnd doch so grob dauon ohn alle schew reden dörfen
 / das ein from hertz darüber erzittern möchte /
 ist sich nicht wenig zu verwundern / daß nemlich der
 leib Christi auß der hand des Priesters komme in
 den vnsaubern mund der Gottlosen buben. Item
 der Papst hab recht gesagt / daß wir mit vnsern zä-
 nen zerdrucken vnd zureiben den warhafftigen leib
 Christi. Item / die schöne frag / die auß einem Lu-
 therischen Hoff gehn Wormbs Anno 57 / an die

Wer Chri-
 stum von
 seinem
 Thron ab-
 setze.

Die Con-
 substanti-
 ation.

Wer des
H. Erren
Testamēt
cassiere.

Theologen gelange / ob der Leib Christi von dem
mund bis in den bauch käme / vnd dergleiche vnges-
schickter reden. Wir geben auch allen fromen Chri-
sten zuerkennen / ob nicht diese leuht des H. Erren
Testament cassiren vnd vernichtigen / da sie dassel-
bige nicht in der gnädigen vergebung der Sünden
durch das blut Jesu Christi / sonder in der mündli-
chen niessung des leibs vnd bluts Christi gründen /
vnd also alle kinder drauß schliessen / den Gottlosen
aber vnd Heuchlern / die vom Kelch trincken / sol-
ches vergünnen / wie dann nach dem Buchstäbisch-
en verstand der wort der einsetzung vnd deren leuht
meinung / das Testament Christi were nicht der
leib für vns gegeben / sonder allein der Kelch / die-
weil vom Kelch / nicht vom brot gesagt wirt / es sey
das newe Testamēt in seinem blut. Wie wenig auch
Oslander halte von den Worten der einsetzung / ist
auß dem wol abzunemen / daß er dieselbige nicht
zum rechten grund der gegenwart Christi im H.
Abendmal setzet: sonder die Persönliche verein-
gung vnd allenthalbenheit des leibs Christi / der
vorhin auch ausser der Action des H. Abendmals
in Brot vnd inn allen Creaturen sey: menger also
gar vnteröstlich vnd vnbescheiden die allgemeine
gegenwart Gottes / der den Teufflen selbs nach art
seiner rechten Hand gegenwertig / mit der gnaden
gegenwart vnd gemeinschafft Christi / mit seinen
gliedmassen / die im H. Abendmal bezeuget wirt.
In summa es ist nicht zusagen was für vngereim-
ter / vngeschickter / vñ vnbestendiger lehren auß die-
ser leuht meinung fließen / da sie an statt des einigen
wahren grunds widerwertige grund erwelet / vnd
gar

gar nicht nach der warheit / sonder allein vnnnd für
 nemlich darnach / daß sie ihren primat vnd ehrgeitz
 erhalten / getrachtet / vnnnd die vn selige Obiquiter
 zu Canonisiren sich vnderstanden haben. Jetzt gilt
 bey ihnen der gemein Præceptor Philippus nichts
 mehr : auch die Augspurgische Confession nicht /
 welche ihre Pfarrherrn nicht lesen dörrffen abique
 Antidoto sine correctiuo normæ Bergensis, vnd erfah
 ren wir / daß ja der mehrertheil der Prediger / die vn
 der ihrem Stab gewesen / da sie zu red gestelt wer
 den von der erklärang der lehre von den H. Sacra
 menten / so in der Apologi Augspurgischer Confes
 sion steht / nichts wissen / vnd sich allein ad affirmati
 uas & negatiuas normæ Bergensis beruffen / etliche
 auch bekennen / daß sie solches Concordibuch nit
 durch gelesen / sonder aliorum exemplo vnnnd mit ges
 wissen bedingungen vnder geschrieben haben.

Derwegen wollen alle fromme aufrichtige
 Lehrer vnd zuhörere in der Churfürstlichen Pfaltz /
 sich durch diesen newen Papst vnd lesterer Osian
 drum (der dieselbigen gern freuentlich ihrer pflich
 ten / damit sie vnser G. Herrschafft zugethan / ledig
 zehlen / auff andere Herrschafften weisen / an etli
 che vn bündige / vn befugte / durch etlich wenig vn
 ruwiger leuht / hinder die hohe Käht auffgelegte /
 vnd wider die Christliche lieb vñ Kirchenordnung
 streitende Iuramenta binden / vnd ein beschwerlichs
 gerümpel vnd zerrüttung in der Churf. Pfaltz / wie
 der Papst newlicher zeit in Engelland gethan / ver
 messenlich anrichten wolt /) mit nichten verführen
 vnd blenden lassen / sintemal Auffrührer nie kein
 gut end genommen / wie es Campianus vnd andere
 Baals

Ermanüg
 an die Leh
 rer vnd zu
 hörere in
 der Churf.
 Pfaltz.

Baalspfaffen in Engelland erfahren / vnnnd sich vor denen sehr zu hüten / welche die Herrschafften verachten / sind dürstig / eigensinnig / locken an sich die leichtfertige seelen / haben ein hertz durchtrieben mit geiz / lestern / da sienichts von wissen / wie S. Peter spricht 2 Epist. 2 cap. Wir haben Gott viel mehr von hertzen zudanken / daß er in disen betrübtten zeiten / da der Papst zu Rom durch die Spanier das Vatterland sehr beschwerlich angreiff / einen solchen Administratorem der Churf. Pfaltz erwecket hat / der nicht allein ein geborner Pfaltzgraff / ja Churfürstlicher Sohn vnd Bruder ist / vnd dem allein diese löbliche Administration von rechtswegen gebüret / sonder auch seinen ernstten eiffer zu der waren Christlichen Religion / vnd dem Vatterland in vielen gefährlichen zügen bewiesen / vnd in dem jetzt (also zureden) der Gottselige / fromme / vnd sanfftmütige Churfürst Friederich der drit / hochlöblichster gedächtnuß / gleichsam wider lebet / vnd der darnach trachtet / daß in der Churf. Pfaltz güte vnnnd trewe einander begegnen / gerechtigkeit vnd friede einander küssen / wie David redet im 85 Psalm.

Ermanüg
an die Eu-
angelische
Potenta-
ten / vnnnd
Politische
Räht.

Es wollen auch alle verstendige Euangelische Potentaten vnd Politische Räht bedencken / ob der angemastte primat in Teutschland dem Ostiandro gebüre / vnd was vnrahts drauß erfolgen würde / wann durch diser leut anstiftung die Fürsten wider vnschuldige leuht verbittert / vnd solchen vngestümmen / wütenden / newgebornen Prelaten das Richter ampt dermassen ingeräumpt werden solt / daß sie nicht allein dabey zu Hoff / vnd

vnd in der Canteley alles regieren / sonder auch frembder Herrn Canteleyen vnd Mandata registrieren / vrtheilen / vñ derselben vnderthanen auffwickeln solten / wie der leidige Teuffel vor wenig Jaren durch einen losen buben Iohann Marion genant / (der lang in der verstrickung gewesen / vnd in seinem bösen fürnemen ergrieffen worden) damit vmbgangen / daß durch ausländische Politische Potentaten / etliche Ubiquitische Clamanten erkauft vnd practicirt würden / allerley vnruh wider zwen treffentliche fromme / dapffere Teutsche Fürsten zu erregē. Da dergleichen ding aber gestartet würden / Hilff Gott / wie ein erbermlicher stand were zugewarten / da würde freylich das end ärger dann der anfang / vnd dieser letzter Antichrist schädlicher seyn als der erste. Leglich bitten vnd vermanen wir alle friedfertige / bescheidene Lutherische Kirchen vnd Schuldiener / wo die seynd / daß sie nicht Dsiandri Hunde seyn wollen / wie er sie / in seiner auffrührischen warnung wider das Christlich Mandat / nennen thut / vnd zu bellen vermanet / sonder viel mehr sich besleissen / Schafflein Jesu Christi zu seyn / vnd diesen spruch Matth. II zubeherzigen: Lernet von mir / dann ich bin sanfftmütig / vnd von herzen demütig / so werdet ihr ruhe finden für ewere seelen. Wollen auch ihre zuhörer nicht auff streitschriefften der Menschen / sonder auff das rein vnd lauter wort Gottes / vnd bewerte Symbola weisen / vnd mercken / daß in denselbigen / wie auch in der Augspurgischen Confession vnd Apologi, weder die vn selige Ubiquitet /

Iohann Marion.

Ermanlig
an die Lutheranische
Kirchen
vnd schuldiener
in
der Churf.
Pfalz.

noch die fundamenta Ssian dri / vnd seines anhangs zu finden / darumb solche Iuramenta, da sich etliche möchten verpflichtet haben / bey den verdammungen der reinen lehr von der person Christi vnd vom H. Abendmal / vnd der Ubiquitisten Concordi zu bleiben / wie sie nicht ohne sünd gethan / Können auch ohne sünd vñ grosser beschwerdt des gewissens nicht gehalten werden. Vnd da schon auß Gottes verhängnuß / vñnd gerechtem vrtheil vber vnser sünden vnd vndanckbarkeit / das newe Papstumb Ssian dri ein solchen vermeinten fortgang gewinnen solt / (wie er mit seinen Adherenten auß menschlichen arm sich allerdings verläßt vnd truzet) daß friedfertige reine Lehrer vnd Prediger / die ihre Knie vor Ssian dro vnd seiner Ubiquitet nicht biegen wollen / in beschwerliche gefängnuß / vnd andere gefahr kommen / ja mit Weib vnd Kindern / wie hienor geschehen / ins elend mit grossen grimmen vertrieben werden müßten / vñ keinen platz im Römischen vñnd Ubiquitetischen Pápstischen Reich hetten / so sollen sie sich doch dessen getrösten / daß sie auß dem Reich Christi nicht geschlossen seyn / vnd daß ein gut gewissen weit ist vber alle wollüst der welt / daß auch gleichwol die warheit not leiden vnd gedruckt / aber nicht vnderdruckt werden kan / vnd daß der HERR zu seiner zeit der Kinder Edom dannoch gedenccken wirt / die da sagen: Kein ab / Kein ab biß auff den boden.

Ein bitt
zu Gott
für Ssian
der.

Gott ist aber zu bitten / daß er dem D. Ssian dro (der ohn zweiffel von den sanfften / rüwigen rathen vnd grosser Auctoritet vnd Præminenz / die er vber die 20 Jar zu Hoff gehabt / etwas geil vnd frech)

frech worden) ein Christliche sanfftmüt / vnd bescheidenheit wolle verleihen / damit er seinem beruff zu Stutgart / mit welchem er genug zuthun vnd zu warnen hat / in frieden außwarre / vnd dem MORGEN / dem sohn lemini, der den frommen Fürstern David verlestert hat / wie er klagt im 7 Psalm / nicht ehnlich werde / sonder seine Zunge für bösem behüten / seine lippen daß sie nicht falsch reden / vnd dem frieden nach **JAGERN** wölle / Amen.



Faint, illegible text, likely bleed-through from the reverse side of the page.



AB: 754887

ULB Halle 3
004 333 152



f

sb.

R

V017



10

Gegenwarnung
ahn
Doctor Lucas Osi-
ander /

Dasz er sich eines newen Antichri-
stischen gewalts in der Kirchen nicht anmassen/
vnd frömbde Diener vnd Vnderthanen wider ihre Christli-
che Obrigkeit / vnd dero Gottselige / friedfertige Man-
data nicht verhezen wolle.

Gestellt
Durch etliche reine Prediger des Göttlichen
worts zu Heidelberg.



Tit. 3.

Erinnere sie / daß sie den Fürsten vnd der Oberkeit vn-
derthan vnd gehorsam seyen / zu allen guten wercken
bereit seyen: Niemand lestern / nicht hadern / gelinde
seyen / alle sanfftmutigkeit beweisen gegen allen
menschen.

Gedruckt durch Mattheum Harnisch.
1584.

